

四庫全書

集部

欽定四庫全書

集部

施註蘇詩年譜

詳校官庶吉士臣李傳熊

檢討臣何思鈞覆勘

覆校官中書臣宋 鎔

校對官助教臣卜維吉

膳錄舉人臣蔣雲師

欽定四庫全書

東坡先生年譜

五羊

王宗稷 編

武進後學邵長蘅重訂

仁宗景祐三年丙子

先生生於是年十二月十九日乙卯時按先生送沈  
達詩云嗟我與君皆丙子又有贈長蘆長老詩云與  
公同丙子三萬六千日又按玉局文云十二月十九

日東坡生日置酒赤壁磯上又按志林云退之以磨  
蝎為身宮而僕以磨蝎為命若以磨蝎為命推之則

為卯時生

傳藻紀年錄十二月十九日卯  
時公生於眉山縣紗帽行私第

四年丁丑

寶元元年戊寅

二年己卯

康定元年庚辰

慶厯元年辛巳

二年壬午

是年先生七歲已知讀書按先生上韓魏公梅直講書云自七八歲知讀書又按先生長短句集洞仙歌自序云僕七歲時見眉州老尼姓朱年九十餘能知孟昶宮中事又考冷齋夜話載先生云某七八歲時常夢游陝右

三年癸未

是年先生八歲入小學按志林云吾八歲入小學以

道士張易簡為師師獨稱吾與陳太初者又按先生  
作范文正公文集序云慶厯三年某始入鄉校士有  
自京師來以魯人石守道慶厯聖德詩示鄉先生某  
從旁竊觀問先生十一人何人也先生曰童子何用  
知之某曰此天人也耶則不敢知若亦人耳何為其  
不可

四年甲申

五年乙酉

按子由作先生墓誌云公生十年而先君宦學四方  
太夫人親授以書問古今成敗輒能語其要太夫人  
讀東漢史至范滂傳慨然太息公侍側曰某若為滂  
夫人亦許之否乎夫人曰汝能為滂吾顧不能為滂  
母耶公亦奮厲有當世志太夫人喜曰吾有子矣又  
按大全集載東坡少時語云秦少章言東坡十來歲  
老蘇曾令作夏侯太初論有人能碎千金之璧不能  
無失聲於破釜能搏猛虎不能無變色於蜂蠆之語

老蘇愛此論年少所作故不傳又按趙德麟所編侯  
鯖錄云東坡年十歲在鄉里見老蘇誦歐公謝宣召  
赴學士院仍謝賜對衣金帶及馬表老蘇令坡擬之  
其間有匪伊垂之帶有餘非敢後也馬不進老蘇喜  
曰此子他日當自用之

六年丙戌

七年丁亥

先生年十二按先生所作天石硯銘曰某年十二時



於所居紗縠行宅隙地中與羣兒鑿地為戲得異石  
鏗然扣之有聲又按先生作鍾子翼哀詞云某年十  
二先君宮師歸自江南又按先生與曾子固書云祖  
父之沒某年十二矣

八年戊子

皇祐元年己丑

二年庚寅

三年辛卯

四年壬辰

先生年十七按長短句滿庭芳序云余年十七始與  
劉仲達往來於眉山

五年癸巳

至和元年甲午

先生年十九始娶眉州青神王方女按先生作王氏  
墓誌云生十有六歲而歸於某至治平二年王氏卒  
年二十有七以王氏年數考之則甲午年歸於先生

明矣

二年乙未

是歲先生年二十游成都謁張安道按先生作樂全  
先生文集序云某年二十以諸生見公成都一見待  
以國士有鼂美叔是年求交於先生按送美叔詩云  
我生二十無朋儔當時四海一子由君來叩門若有  
求

嘉祐元年丙申

先生年二十一舉進士按鳳鳴驛記云始余丙申歲  
舉進士過扶風求舍於館人不可而出次於逆旅又  
有寫老蘇送石舍人序

紀年錄范文正公文集序云  
嘉祐元年始舉進士至京師

牛口見月詩云忽憶  
丙申年京師大雨滂

## 二年丁酉

先生年二十二赴試禮部館於興國寺浴室院時歐  
陽文忠公考試得先生刑賞忠厚之至論以為異人  
欲冠多士疑曾子固所為子固文忠門下士也乃寘

先生第二復以春秋對義居第一及殿試章衡榜中進士乙科始見知於歐陽公及韓魏公富鄭公皆待以國士又按先生作太息一篇送秦少章歸京云昔吾舉進士試名於禮部歐陽文忠公見吾文且曰此我輩人也吾當避之是時士以剽裂為文訕公者成市又有上韓太尉書云某年二十有二矣及有上梅直講書是年先生登第之後四月丁太夫人武陽君程氏憂按司馬溫公作程夫人墓誌云夫人以嘉祐

二年四月癸丑終於鄉里又按老蘇寄文忠公書云

一子不免丁憂今已到家

紀年錄文忠公嘗令鼂美叔與公定交謂公必名世

且以書抵聖俞曰讀軾書不覺汗出快哉快哉老夫當避此人放出一頭地文忠公未嘗以此許人也

三年戊戌

四年己亥

是歲先生年二十四服除十二月侍老蘇舟行適楚  
按先生南行前集序云己亥之歲侍行適楚舟中無  
事雖然有觸於中而發於詠嘆蓋家君之作與弟轍

之文皆在焉謂之南行集

紀年錄是年荊州上王兵部書曰自蜀至楚舟行六

十日過郡十一縣二十有六公由水路至嘉州入嘉陵江由瀘渝涪忠夔等州入峽江故作嘉州過宜賓泊牛口望夫臺仙都觀入峽出峽等詩自荊門出陸由宜城襄鄆唐許尉氏至京故作荊陽早發漢水竹

葉酒留尉氏阮籍嘯

臺許州西湖等詩

## 五年庚子

是歲先生年二十五授河南府福昌縣主簿有新渠

詩其序云庚子正月予過唐州太守趙侯始復三陂

疏名渠為新渠詩五章以告於道路致侯之意

紀年錄過

許見范堯夫文正公文集序曰其後  
過許始識公之仲子今丞相堯夫

六年辛丑

是年先生二十六應中制科入第三等有應制科上  
兩制書及上富丞相書又有謝應中制科啟授大理  
評事鳳翔府簽判按先生有感舊詩序云嘉祐中予  
與子由奉制策寓居懷遠驛時年二十六子由年二  
十三耳是年十二月赴鳳翔任與子由別馬上賦詩  
到任有石鼓詩云冬十二月歲辛丑我初從政見魯



叟又有鳳翔八觀詩及鳳鳴驛記

七年壬寅

先生年二十七官於鳳翔二月有詔郡吏分往屬縣  
決囚作詩五百言寄子由又有壬寅重九不預會遊  
普門寺僧閣有懷子由詩及按志林有論太白山舊  
封公爵為文記之是歲嘉祐七年也又有記歲暮鄉  
俗三首以子由和守歲詩考之云願免追龍蛇子由  
注云是歲壬寅乃知記歲暮鄉俗三詩作於壬寅歲

矣

八年癸卯

先生年二十八官於鳳翔作思治論

紀年錄英宗即位公在鳳翔軍

恩轉大理寺丞

英宗治平元年甲辰

先生年二十九官於鳳翔

紀年錄公在鳳翔磨勘轉殿中丞冬任滿還京至華

陰作詩  
寄子由

二年乙巳

先生年三十自鳳翔罷任按子由作先生墓誌云治平二年罷還判登聞鼓院英宗皇帝在藩邸聞先生名欲以唐故事召入翰林宰相限以近例召試秘閣皆入三等得直史館是年通義郡君王氏卒於京師

紀年錄五月二十八日夫人王氏卒六月六日殯於京城外夫人有子邁

三年丙午

先生年三十一在京師直史館丁老蘇憂扶護歸蜀按歐陽文忠公作老蘇墓誌云明允太常因革禮書

一百卷書成方奏未報君以疾卒實治平三年四月  
戊申也又按張安道作老蘇文安先生墓表云太常  
禮書成未報以疾卒實治平三年四月也英宗皇帝  
聞而傷之命有司具舟載其喪歸葬於蜀  
四年丁未

先生年三十二居服制中以八月壬辰葬老蘇於眉

州

紀年錄神宗即位九月壬  
五日題墓本蘭亭記後

神宗熙寧元年戊申

先生年三十三免喪按四菩薩閣記云載四菩薩版  
以歸既免喪嘗與往來浮屠人勸某為先君捨施為  
大閣以藏之作記乃熙寧元年十月

二年己酉

先生年三十四還朝監官告院按烏臺詩話云熙寧  
二年某在京授差遣與王詵寫詩賦及蓮華經

三年庚戌

先生年三十五監官告院有送錢藻知婺州詩分韻

得英字送曾子固倅越詩分韻得燕字烏臺詩話云  
舊例館閣補外同舍餞送必分韻又有寄劉貢父詩  
是年范景仁嘗舉先生充諫官

四年辛亥

先生年三十六任監官告院兼判尚書祠部王荊公  
欲變科舉上疑焉使兩制三館議之先生獻三言荊  
公之黨不悅命攝開封府推官有奏罷買燈疏御史  
知雜事誣告先生過失未嘗一言以自辯乞外任避

之除通判杭州有赴任過揚州與劉貢甫孫巨源劉  
莘老相聚數月各以其字為韻作詩十一月到任有  
初到杭州寄子由兩絕除夕先生以通判職事直都  
廳日暮返舍題一詩於壁

紀年錄臘月遊孤山訪惠  
勤惠思二僧作詩又和李

祀并  
自和

### 五年壬子

先生年三十七在杭州通判任是歲有牡丹記其序  
云熙寧五年三月二十三日余從太守沈公觀花於

吉祥寺是年科場先生監試有呈試官詩及試院煎  
茶詩催試官考較戲作八月十七日登望湖樓是日  
榜出與試官兩人復留有五絕句又有送杭州進士  
詩序云熙寧五年錢塘之士貢於禮部者九人十月  
乙酉宴於中和堂作是詩以勉之十二日運司差先  
生往湖州相度堤埭利害與湖州太守孫莘老相見  
有贈莘老七絕及作山村五絕是歲又作送杜子方  
詩

紀年錄閏七月哭歐陽  
公於孤山次韻惠思詩



六年癸丑

先生年三十八在杭州通判任有八月十五觀潮詩  
寫於安濟亭上及作仁宗皇帝飛白記其畧云熙寧  
六年冬以事至姑蘇安簡王公子誨出所賜公端敏  
二字又有作錢塘六井記其畧云熙寧五年太守陳  
公述古至問民之利病明年春六井畢修故詳其語  
以告後人運司又差先生往潤州道出秀州錢安道  
送茶和詩是歲有次韻答章傳道詩寄劉道原詩及

和陳述古冬日牡丹詩四絕又有題贈法惠師小童

思聰

紀年錄正月九日作雜興答鮮于子駿上元祥符寺九曲觀燈作詩二十一日述古邀城外尋

春作詩二十七日遊風水洞作詩又作李伋留待及和等詩冬以事至姑蘇為王誨作仁宗御飛白記又

作三瑞堂詩除夜宿常州城外作詩

七年甲寅

先生年三十九在杭州通判任是年納侍妾朝雲墓誌云朝雲姓王氏錢塘人事先生二十有三年紹聖三年卒於惠州年三十四以歲月考之熙寧之甲寅

至紹聖之丙子恰二十三年乃知納朝雲在是年明  
矣朝雲年三十四是為癸卯生東事先生方十二云  
先生以子由在濟南求為東州守按子由超然臺賦  
序云子瞻通守餘杭三年不得代以轍之在濟南也  
求為東州守既得請高密五月乃有移知密州之命  
按先生作勤上人詩集序云熙寧七年余自錢塘赴  
高密又按先生辛未別天竺觀音詩序云余昔通守  
錢塘移蒞膠西以九月二十日來別南北山道友乃

知先生以秋末去杭按先生記游松江說云吾昔自杭移高密與楊元素同舟而陳令舉張子野皆從余過李公擇於湖遂與劉孝叔俱至松江夜半月出置酒垂虹亭上子野年八十五以歌詞聞於天下作定風波令及道過常州為錢公輔作哀辭及有與段正田詩云龍鍾三十九勞生已強半歲暮日斜時還為昔人嘆是年又作鳬繹先生文集序又有師子屏風贊云潤州甘露寺有唐李衛公所留陸探微畫師子

版余自錢塘移守膠西過而觀焉是年又有潤州道

上過除夜詩兩絕詩見續補遺

紀年錄元日以事過并陽作寄魯元翰及

柳子玉鶴林招隱并與子玉景純唱和等詩是月秀  
州贈錢端公文長老等詩二十九日過毗陵跋孝後  
主書五月作錢公輔哀詞又次韻周郊詩六月自常  
潤還所至作詩秋捕蝗至浮雲嶺作懷子由詩至於  
潛作贈毛國華野翁亭綠雲軒於潛女詩又同年臨  
安令劇飲并所至諸縣有詩九月移知密州是月作  
勤上人詩集序十月赴密州早行馬上作沁園春十  
一月三日到任十二月有除夜病中贈段北海詩蘅  
接是年除夜紀年錄云先生已任密州年譜云在潤  
州道上各以先生詩為据依然考紀年錄是年起元  
日至除夜記載特詳先生以十月赴密州年譜亦云  
秋末去杭不應除夜仍在潤州道中姑存疑俟考

八年乙卯

先生年四十到密州任有上韓丞相論災傷書其到  
郡二十餘日矣又論密州鹽稅又作後杞菊賦其序  
云予仕官十有九年家日益貧移守膠西而齋厨索  
然按先生丁酉年登第至是恰十九年矣是年有寄  
劉孝叔詩及和李公擇東字韻詩及常山祈雨感應  
立雲泉

九年丙辰

先生年四十一在密州任作刻秦篆記云熙寧九年  
丙辰蜀人蘇某等守高密是年中秋歡飲達旦作水  
調歌頭懷子由及作薄薄酒二章又寫超然臺記寄  
李清臣又祭常山神文書膠西蓋公堂照壁畫贊及  
作山堂銘作表忠觀碑

紀年錄十二月移知  
徐州除夜留濰州

十月丁巳

先生年四十二在密州任

按去年十二月先生已  
離密州當從紀年錄

就

差知河中府已而改知徐州四月赴徐州任有留別

釋迦院牡丹呈趙倅詩按子由作先生墓誌云自密徙徐是歲河決曹村乃知是丁巳自密改東徐又與子由相會於澶濮之間相約赴彭城留百餘日宿於逍遙堂子由有兩絕先生和之徐州水患大作七月十七日河決澶州曹村埽八月二十一日及徐州城下先生治水有功至十月五日水漸退城以全朝廷降詔獎諭作河復詩韓幹畫馬歌司馬君實獨樂園詩及送范蜀公往西京詩又有和子由水調歌頭詞



及有與王定國顏長道泛舟詩有回頭四十二年非

之句

紀年錄元日早晴離濰州作詩青州道上大雪作詩二月到京作送范蜀公詩

元豐元年戊午

先生年四十三在徐州任適值春旱徐州城東二十

里有石潭置虎頭其中可致雷雨作起伏龍行是年

三月始識王迥子高聞與仙人周瑤英遊作芙蓉城

詩二月有旨賜錢二千四百一十萬起夫四千二十

三人及發常平錢米改築徐州外小城創木岸四以

獎諭敕記併刻諸石為熙寧防河錄云迺即徐州城之東門為大樓堊以黃土名之曰黃樓以土實勝水故也子由作黃樓賦先生跋云元豐元年八月癸丑樓成九月庚辰大合樂以落之又有中秋月三首云六年逢此月五年照離別先生注云中秋有月凡六年矣惟去歲與子由會於此去歲之會乃逍遙堂和詩之時也又有九日黃樓作古詩一首云去年重陽不可說南城夜半千漚發之句以去年九月大水未

退故有是語又作放鶴亭記滕縣公堂記鹿鳴燕詩  
序和魯直古風二首及次韻潛師放魚和舒堯文祈  
雪詩祭文與可及作石炭詩又作日喻一篇

二年己未

先生年四十四在徐州任正月己亥同畢仲孫舒煥  
八人游泗之上登石室使道士載日祥鼓雷氏琴先  
生有記按玉局文云僕在徐州王子立子敏皆館於  
官舍而蜀人張師厚來過二王方年少吹洞簫飲酒

杏花下三月自徐州移知湖州按先生作張氏園亭  
記云余自彭城移守吳興由宋登舟三宿而至其記  
乃三月二十七日所作乃知三月移湖州明矣是年  
以四月二十九日到湖州任作送通教大師還杭州  
序及為章質夫作思堂記王定國作三槐堂記跋歐  
陽文忠公家書後在湖州王子立子敏皆從先生作  
子立墓誌云子立子敏皆從余學於吳興學道日進  
東南之士稱之有與王郎昆仲及兒子邁遠城觀荷

花登峴山亭晚入飛英寺分韻得月明星稀四首又  
有泛舟城西會者五人分韻得人皆苦炎字四首又  
作文與可畫篋簞谷偃竹記其末云元豐二年七月  
七日子在湖州曝書見畫廢卷而哭失聲是歲言事  
者以先生湖州到任謝表以為謗七月二十八日中  
使皇甫遵到湖追攝按子立墓誌云子得罪於吳興  
親戚故人皆驚散獨兩王子不去送予出郊曰死生  
禍福天也公其如天何迺取子家致之南都又按先

生上文潞公書云某始就逮赴獄有一子稍長徒步相隨其餘守舍皆婦女幼稚至宿州御史符下就家取書州郡望風遣吏發卒圍船搜取長幼幾怖死既去婦女恚罵曰是好著書書成何所得而怖我如此悉取焚之八月十八日赴臺獄中有寄子由詩二首及賦榆槐竹栢四詩又有十二月二十日恭聞太皇太后升遐吏以某罪人不許成服欲哭則不可欲泣則不敢作挽詩二首已而獄具十二月二十九日責

授黃州團練副使本州安置是年子由聞先生下獄  
上書乞以見任官職贖先生罪責筠州酒官出獄再

次寄子由二詩韻有百日歸期恰及春之句先生自

八月坐獄至是踰百日矣

紀年錄七月太子中允權  
監察御史何大正舒亶諫

議大夫李定言公作為詩文謗訕朝政及中外臣寮  
無所畏憚國子博士李宜之狀亦上七月二日崇政  
殿進呈奉聖旨送御史臺根勘二十八日皇甫遵到  
湖州追攝過南京文定張公上劄范蜀公上書救之

三年庚申

先生年四十五責黃州自京師道出陳州子由自南

郡東陳相見三日而別先生有古詩有便為齊安民  
之句又與文逸民飲別攜手河堤上作詩與子由別  
乃正月十有四日也至十八日蔡州道上遇雪有次  
子由韻古詩二首過新息縣有示鄉人任師中一首  
任伋字師中眉州人嘗倅黃州卜居新息又有過淮  
詩游淨居寺詩至岐亭訪故人陳慥季常為留五日  
賦詩一首而去以二月一日至黃州寓居定惠院有  
初到黃州詩按先生別王文甫子辯云僕以元豐三



年二月一日到黃州家在南都獨與兒子邁來是年  
五月子由來齊安先生有詩迎之又有曉至巴河迎  
子由詩乃與子由同遊武昌西山寒溪寺有古詩一  
首定惠顓師為先生竹下開嘯軒作詩記其事又作  
五禽言又有定惠寺寓居月夜偶出詩云去年花落  
在徐州對月酣歌美清夜今年黃州見花發小院閉  
門風露下蓋懷在徐州與張師厚王子立子敏飲酒  
杏花下時也定惠有海棠一株土人不知其貴先生

作詩有也知造物有深意故遣佳人在幽谷之句按  
黃州東坡圖云先生寓居定惠未久以是春還臨臯  
亭乃舊日之回車院也又有遷居臨臯亭詩先生就  
臨臯亭立南堂有詩五絕又有讀戰國策及作石芝  
詩是歲又有答秦太虛書借得本州天慶觀道士堂  
冬至後坐四十九日先生乳母王氏八月卒於臨臯  
亭按先生上文潞公書云到黃州無所用心覃思易  
論語若有所得由是言之先生到黃定居之後即作

易傳九卷論語五卷必始於是歲矣

四年辛酉

先生年四十六在黃州寓居臨皋亭正月往岐亭訪  
陳季常以岐亭五首考之云元豐三年正月岐亭為  
留五日明年正月復往見之過古黃州獲一鑑有鑑  
銘云元豐四年正月余自齊安往岐亭泛舟而還過  
古黃州獲一鑑周尺有二寸是年先生請故營地之  
東名之以東坡考東坡八首序云余至黃二年日以

困置故人馬正卿哀予乏食於郡請故營地使躬耕  
其中蓋先生庚申來黃至辛酉為二年以東坡圖考  
之辛酉方營東坡次年始築雪堂有贈孔毅甫詩云  
去年東坡拾瓦礫今年刈草蓋雪堂則雪堂之作在  
壬戌歲矣又有中秋日飲酒江亭上有贈鄭君求字  
及記游松江說聞捷說按大全集雜說云元豐辛酉  
冬至僕在黃州姪安節遠來飲酒樂甚以識一時盛  
事又有冬至贈安節詩云平生幾冬至至少小如昨日

又有與安節夜坐賦繫字韻詩三首及正月過岐亭  
作應夢羅漢記

五年壬戌

先生年四十七在黃州寓居臨皋亭就東坡築雪堂  
自號東坡居士以東坡圖考之自黃州門南至雪堂  
四百三十步堂以大雪中為之因繪雪於四壁之間  
無容隙其名蓋起於此先生自書東坡雪堂四字榜  
之是年三月先生以事至蘄水悼徐德占詩序云元

豐五年三月余以事至蘄水德占惠然見訪又有春  
夜行蘄水過酒家飲酒乘月至一橋上曲肱少休作  
西江月詞又遊蘄水清泉寺作浣溪沙詞又作寒食  
詩二首云自我來黃州已見三寒食太守徐君猷分  
新火先生有詩謝之有臨臯亭中一危坐三見清明  
改新火之句七月遊赤壁有赤壁賦云壬戌之秋七  
月既望蘇子與客泛舟遊於赤壁之下十月又遊之  
有後赤壁賦云十月既望蘇子步自雪堂將歸於臨

皋則壬戌之冬未遷而先生以甲子六月移汝其居  
雪堂止年餘由是推之先生自臨皋遷雪堂必在壬  
戌十月後矣又有和孔毅甫久旱已而甚雨詩云去  
年太歲空在酉乃知指去年辛酉言之也又按長短  
句有飲王文甫家集古句作墨竹定風波及夢扁舟  
望樓霞作鼓笛慢及記單驤孫兆事迹作怪石供及  
重九作醉蓬萊示黃守徐君猷有羈旅三年之句先  
生庚申來黃至是恰三年矣

紀年錄十二月十九東坡生日也置酒赤壁磯

下踞高峯俯鵲巢酒酣笛聲起於江上客有郭古二  
生頗知音謂坡曰笛聲有新意非俗工也使人間之  
則進士李委聞坡生日作新曲曰鵲南飛以獻呼之  
使前則青巾紫裘腰笛而已既奏新曲又快作數弄  
嘹然有穿雲裂石之聲坐客皆引滿醉倒  
委求詩作一絕句王郎以詩見慶次其韻

六年癸亥

先生年四十八在黃州為通判孟亨之跋子由君子  
泉銘及有題唐林父筆文閏八月有詩與武昌主簿  
吳亮工又有記承天夜遊云十月十二夜至承天寺  
尋張懷民相與步於中庭庭中如積水空明水中藻



行蓋竹栢影也及作一絕送曹煥往筠州序云明年  
余過圓通始得其詳先生甲子歲自黃之汝遊廬山  
則送曹煥詩必在是年矣又夢中作祭春牛文云元  
豐六年十二月二十七日天欲明夢數吏人持紙請  
祭春牛文予取筆疾書其上

紀年錄七月二十七日  
生小子遜小名幹兒

七年甲子

先生年四十九在黃州二月與徐得之參寥子步自  
雪堂至乾明寺有師中菴題名又有記定惠寺海棠

說四月乃有量移汝州之命按先生長短句滿庭芳序云四月一日余將自黃移汝留別雪堂鄰里二三君子李仲覽來書以遺之詞中有坐見黃州再閨之句按東坡圖云郡人潘邠老及弟大觀俱以詩知名多從先生遊先生去以雪堂付之邠老因以居焉四月六日又作安國寺記有別黃州詩有過江夜行武昌山上聞黃州鼓角詩黃州送先生者皆至於慈湖陳季常獨至九江既到江州和李大白潯陽宮詩其

序云今予亦四十九感之次其韻因游廬山有記遊廬山說云僕初入廬山山谷奇秀平生所欲見應接不暇不欲作詩已而山中僧俗皆曰蘇子瞻來矣不覺作一絕入開先寺主僧求詩作瀑布一絕往來十餘日作漱玉亭三峽橋詩與總老同遊西林有贈總老及題西林壁皆絕句也又有寫寶蓋頌與僊長老其序云圓通禪院先君舊遊也四月二十四日晚至宿焉明日先君忌日寫寶蓋頌以贈長老僊公蓋先

生端午已在筠州計程必作宮師忌日後即為高安之行矣途中又有題李公擇山房及過建昌李野夫公擇故居古詩一首按跋李志中文云元豐七年某舟行赴汝乃自富川陸走高安別家弟子由以冷齋夜話考之子由在筠州雲菴居洞山聰禪師亦蜀人居壽聖寺一夕三人同夢迎五祖戒和尚拊手大笑曰世間果有同夢者異哉久之東坡書至曰已至奉新旦夕相見三人同出二十里建山寺而東坡至各

追繹所夢坡曰某年七八歲時嘗夢某身是僧往來  
陝右雲菴驚曰戒陝右人也暮年棄五祖來遊高安  
終於大愚逆數蓋五十年而坡時年四十九矣又以  
先生古詩考之有自興國往筠宿石田驛詩及將至  
筠州先寄遲遠三猶子詩端午遊真如寺及別子  
由三首在筠州為留十日又有初別子由至奉新作  
皆先生筠州之作也七月過金陵有與葉致遠唱和  
詩途中又有送沈達赴廣南詩云嗟我與君皆丙子

四十九年窮不死又云我方北渡脫重江君復南行  
輕萬里逼歲到泗州十二月十八日浴雍熙塔下作  
如夢令兩闋又作滿庭芳與劉元達序云余年十七  
與仲達往來於眉山四十九相逢於泗上晦日同遊  
南山話舊感嘆又有跋李志中文天石硯銘又作水  
龍吟及有謝黃師是除夜送酥酒詩先生上表乞於  
常州居住其畧云今雖已至泗州而貲用罄竭見一  
面前去南京聽候朝旨則是年除夜在泗州明矣

年紀

錄六月九日作石鍾山記畧云余自齊安舟行適臨汝而長子邁將赴饒之德興尉送之至湖口二十三日舟過蕪湖七月十八日幼子遯病亡於金陵作詩哭之曰吾年四十九羈旅失幼子

## 八年乙丑

先生年五十按大全集雜說騾馱鐸試筆云今日離泗州然吾方上書求居常州乃正月四日書及到南京有放歸陽羨之命遂居常州五月內復朝奉郎知登州再過密州有贈太守霍翔詩云十年不赴竹馬約蓋先生丁巳歲去密至是以成數為十年矣過海

州嘆高麗館壯麗作一絕到郡五日以禮部郎官召到省半月除起居舍人在登州有海市詩又有別登州舉人詩有嫌五日恩恩守之句又有贈杜介詩及題楞伽跋多寶院文又有題登州蓬萊閣及跋起居

錢公文後

紀年錄哲宗即位復朝奉郎八月十七日得旨除知登州十月十五日到登州二十

日召為禮

部員外郎

哲宗元祐元年丙寅

先生年五十一以七品服入侍延和改賜銀緋尋除



中書舍人按志林云元祐元年余為中書舍人復遷翰林學士知制誥是年有法雲寺鐘銘又作真相院釋迦舍利塔銘及作元祐元年九月六日明堂赦文又有內中告遷神御於新添修殿奉安祝文及奉告天地社稷宗廟宮觀寺院祈雪祝文五嶽四瀆祈雪祝文及任中書舍人日舉江寧府司理周種充學官

及除內翰又有舉魯直自代狀

紀年錄正月除中書舍人辭免狀云臣頃

自貶所知登州到任五日而召以省郎半月而擢為右史云云今又冒榮直授躡等驟遷非惟其人既難

以處不試而用尤非所安九月一日司馬溫公薨作  
祭文行狀十月十二日書黃泥坂辭遺王晉卿是日  
除翰林學士知制誥十一月供翰林學士職尋除侍  
讀召入院九日考試館職與聖求會宿玉堂作武昌  
西山詩十二月五日與秋  
詠同館北客書秋武襄事

二年丁卯

先生年五十二為翰林學士復除侍讀有書石舍人  
北使序後及有與喬全寄賀君詩其序云元祐二年  
全來京師十數日子留之不可又有二月八日朝退  
起居院感申公故事作一絕又有書子由日本扇後

及作祭王宜甫文又作興國寺六祖畫贊云嘉祐初  
舉進士館於興國浴室院予去三十一年而中書舍  
人彭器資亦館於是余往見之按先生嘉祐丁酉舉  
進士至元祐丁卯恰三十一年矣是年又作西京應  
天院修神御畢造遷諸神祝文及奉安神宗皇帝神  
御祝文及景靈宮宣光殿奉安神宗皇帝御容祝文  
五嶽四瀆祈雨祝文天地宗廟社稷祈雨祝文景靈  
宮天興殿開淘井眼祭告里域真官祝文

紀年錄九月十五日

通英殿講論語終篇賜御書詩翌日進詩又進讀故事八說是年作司馬溫公神道碑又作富鄭公神道碑又作趙清獻公神道碑鄭公以元豐六年閏六月二十一日薨于洛陽至是其子紹庭請於朝命公撰碑清獻公以元豐七年八月二十六日薨于杭至是其子岷請於朝命公撰碑又作贈寫真道士李得素曰五十之年初遇二衰顏記我今如此

三年戊辰

先生年五十三任翰林學士有和子由元日省宿致齋有白髮蒼顏五十三之句是年省試先生知貢舉開院日有與李方叔詩序云僕與李鷹方叔相知久

矣僕領貢舉事李不得第愧甚作詩謝之又和錢穆  
父雪中見及有行避門生時小飲之句又充館伴北  
使按先生與陳傳道書云某頃伴鹵使頗能誦某文  
乃知先生高文大冊傳播夷夏又豈止及於鷄林行  
賈而已哉是年作呂大防范純仁左右相制端午帖  
子詞元祐三年六月德音赦文及作西路闕雨祈雨  
祝文按趙德麟侯鯖錄云東坡云元祐三年二月二  
十一日與魯直蔡天啟會於伯時舍錄鬼仙詩又有

議論作詩付過又有論樂等說及與王晉卿論雪堂  
義墨及為文驥作字說又十二月二十一日立延和  
殿中論盛度誥詞

四年己巳

先生年五十四任翰林學士有東太一宮修殿告十  
神太一真君祝文三月內累章請郡除龍圖閣學士  
知杭州按子由作先生墓誌云宣仁心善先生辯察  
持正之謗出郊遣內侍賜龍茶銀合用前執政恩例

先生以七月三日到杭州任謝表云江山故國所至  
如歸父老遺民與臣相問以先生去杭州十六年故  
有是語耳到任有謁文宣王廟祝文云昔自太史通  
守是邦今由禁林出使浙右又有謁諸廟祝文先生  
之帥杭也替林子中先生有和子中詩有江邊遺愛  
嘯班白之句是年過吳興又作定風波為六客詞作  
范文正公文集序及跋邢惇夫賦書米元章又有已  
已重九和蘇伯固點絳唇是歲子由使契丹先生有

詩送之有單于若問君家世莫道中朝第一人之句  
先生出牧餘杭子由代先生為學士

五年庚午

先生年五十五在杭州任有論西湖狀及論高麗公  
案有謝元祐五年應日表有與劉景文蘇伯固遊七  
寶寺題竹上絕句又有庚午重九點絳唇十月二十  
六日與晦老全翁元之叔夫遊南屏寺記點茶試墨  
說十二月遊小靈隱聽林道人彈琴及有乞僧子珪



師號狀除夜有和熙寧中題都廳詩序云熙寧中某  
通守此邦除夜題一詩於壁今二十年矣蓋熙寧辛  
亥至元祐庚午恰二十年是年又有書朱象先畫後  
及問淵明說

六年辛未

先生年五十六在杭州任被召按先生作別天竺觀  
音三絕序云以三月九日被旨赴闕又按先生作參  
寥泉銘云予以寒食去郡又上元作會有獻剪綵花

者作浣溪沙寄袁公濟先生之去杭也林子中復來  
替先生是以先生與子中啟有適相先後之說過潤  
州作臨江仙別張秉道既到京師除翰林承旨復侍  
邇英按子由所作穎濱遺老傳云先生召還本除吏  
部尚書復以臣故改翰林承旨臣之私意元不遑安  
乞寢臣新命與兄同備從官不報六月作上清儲祥  
宮碑其畧云元祐六年六月丙午制詔臣某上清儲  
祥宮成當書之石臣待罪北門記事之成職也按趙

德麟侯鯖錄云先生元祐中再召入院作承旨乃益  
舊擬作衣帶馬表云枯羸之質匪伊垂之帶有餘斂  
退之心非敢後也馬不進數月以弟嫌請郡復以舊  
職知潁州按先生懷舊別子由詩云元祐六年予自  
杭州召還寓居子由東府數月復出領汝陰時子年  
五十六矣紀年錄四月到闕五月入院  
八月除龍圖閣學士知潁州到任有謁文  
宣王及諸廟文有祭歐陽文忠文及有到潁未幾公  
帑已竭齋廚索然戲作數句按趙德麟侯鯖錄云元

祐六年冬汝陰久雪人饑一日天未明東坡先生簡  
召議事曰某一夕不寐念穎人之饑欲出百餘千造  
炊餅救之老妻謂某曰子昨過陳見傳欽之言簽判  
在陳賑濟有功不問其賑濟之法某遂相招令時面  
議曰已備之矣今細民之困不過食與火耳義倉之  
積穀數千石便可支散以救下民作院有炭數萬秤  
酒務有柴數十萬秤依元價賣之可濟中民先生曰  
吾事濟矣遂草放積欠賑濟奏陳履常有詩先生次

韻有可憐擾擾雪中人之句為是故也由此觀之先生善政救民之饑真得循吏之體矣又有聚星堂雪詩祭辯才文跋張乖崖文後及志林載夢中論左傳說及論子厚瓶賦又有十二月二日與歐陽叔弼季默夜坐記道人問真說是年潁州災傷先生奏乞罷黃河夫萬人開本州溝瀆從之

七年壬申

先生年五十七在潁州任按趙德麟侯鯖錄云元祐

七年正月東坡在汝陰州堂前梅花大開月色鮮霽  
先生王夫人曰春月色勝如秋月色秋月令人慘悽  
春月令人和悅何如召趙德麟輩來飲此花下先生  
大喜曰吾不知子亦能詩耶此真詩家語耳遂召與  
二歐飲先生用是語作減字木蘭花有不似秋光只  
與離人照斷腸之句已而改知揚州先生之在潁也  
與趙德麟同治西湖未幾有維揚之命三月十六日  
湖成德麟有詩見懷先生次韻又再和之及作雙石

詩示僚友按冷齋夜話云東坡鎮維揚幕下皆奇豪  
一日石塔長老求解院歸西湖坡與僚佐袖中出疏  
使鼂無咎讀之其詞有為東坡而少留之句已而以  
兵部尚書召有召還至都門先寄字由詩有一味豐  
年說淮潁之句復兼侍讀是年南郊先生為鹵簿使  
尋遷禮部尚書遷端明侍讀學士有讀朱暉傳題文  
潛語後及作醉翁操任兵部尚書日有薦趙德麟狀  
紀年錄二月移知揚州淮上早發作詩三月上巳日  
過濠與迨過游塗山荆山記所見七月和淵明飲酒

詩二十首八月作張文定公滕元發誌銘九月以兵部尚書召兼侍讀郊祀為國簿使尋除端明殿學士兼翰林侍讀學士守禮部尚書冬至作郊祀慶成詩又次韻錢穆父從駕郊丘瞻望天光退而相慶作詩

八年癸酉

先生年五十八任端明侍讀二學士是年先生繼室同安郡君王氏卒於京師按先生作西方阿彌陀贊序云蘇某之妻王氏元祐八年八月一日卒於京師按先生初娶通義郡君王氏乃同安之堂姊先生祭王君錫丈人云某始婚姻公之猶子允有令德天闕



莫遂惟公幼女嗣執壘篚由是推之通義為同安之  
堂姊甚明但未能究再娶歲月耳又有八月二十七  
日建隆章潭館成一絕有坐待宮人畫詔回之句尋  
以二學士出知定州九月十四日東府雨中作示子  
由云去年秋雨時我在廣陵歸今年中山去白首歸  
無期盖定州之除必在九月內矣到定州任有祭韓

魏公文書定州學生硯盖作中山松醪賦

紀年錄十  
二月二十

三日到

定州

紹聖元年甲戌

先生年五十九知定州就任落兩職追一官知英州  
有辭宣聖文行至滑州有乞舟行赴英州狀云帶家  
屬數人前去汴泗之間乘舟泛江倍道而行至南康  
軍出陸赴任未到任間再貶寧遠軍節度副使惠州  
安置過虔州有記真君籤說云八月二十一日過虔  
州與王巖翁同謁祥符宮又有鬱孤臺游字韻詩與  
霍守李倅更和數首又有初入贛作又有題天竺樂

天石刻余年幼時先君自虔州歸言天竺有樂天詩  
今四十七年矣蓋先生年十二老蘇歸自江南至是  
恰四十七年矣是年以十月三日到惠州寓居嘉祐  
寺有初到惠州詩當月十二日與幼子過同遊白水  
佛迹浴於湯池有古詩又按長短句浣溪沙序云紹  
聖元年十月十三日與程鄉令侯晉叔歸善簿覃汲  
游大雲寺野飲松下設松黃湯作此闕余家近釀酒  
名曰萬家春時有虔州鶴田處士王原子直不遠千

里來訪先生留七十日而去至十一月有戲贈朝雲  
詩朝雲先生侍妾也又錄三十九歲潤州道上過除  
夜兩絕付過及有跋朱表臣藏文忠公帖又有與吳  
秀才書吳乃子野之子其書云過廣州買得檀香數  
斤定居之後杜門燒香深念五十九年之非矣又就  
嘉祐寺所居立思無邪齋有贊乃紹聖元年十月二  
十日作

二年乙亥

先生年六十在惠州有惠州上元夜詩詩云去年中  
山府老病亦宵興今年江海上雲房寄山僧以歲月  
考之去年甲戌上元先生知定州今歲乙亥寓嘉祐  
僧舍故有雲房寄山僧之句是年遷居於合江亭以  
先生別王子直語觀之紹聖元年十月三日始至惠  
州寓於嘉祐寺明年遷於合江之行館得江樓豁敞  
之觀忘幽谷窈窕之趣乃知乙亥歲遷居合江樓明  
矣又有松江亭上賦梅花詩及先生行年六十化之

句三月四日同太守詹範器之柯常林柞王原賴仙芝同遊白水山又有與陳季常書云到惠州將半年先生以去年十月三日到惠州三月恰半年矣又有九月二十七日惠州星華館思無邪齋書記外祖程公逸事又有朝斗記讀管幼安傳書魯直跋遠景圖北齋校書圖後又有為幼子過書金光明經後及付僧惠誠遊吳中代書及祭妹德化縣君文有葬枯骨銘時詹守議葬暴骨先生詩有江干白骨已銜恩之

句

三年丙子

先生年六十一在惠州有和陶淵明移居詩云余去  
歲三月自水東嘉祐寺遷去合江樓迨今年得歸  
善後隙地數畝父老云古白鶴觀也意欣然居之營  
白鶴新居始於是矣詩中乃有葺思無邪齋之句先  
生甲戌寓居嘉祐寺已有思無邪齋贊乙亥遷合江  
樓先有書程公逸事於星華館思無邪齋今丙子欲

營新居又曰葺思無邪齋雖三年之間遷居不常意  
其齋名亦隨寓而安矣當年惠州修東西新橋先生  
助以犀帶而子由亦以史夫人頃入內所賜金錢數  
千為助及橋成日先生有詩落之乃有嘆我捐腰犀  
及有探囊賴故侯寶錢出金闥之句又有曇秀道人  
來訪先生而先生題其詩卷云予在廣陵曇秀作詩  
予和之後五年曇秀來惠州見予先生以壬申知揚  
州至是恰五年矣時吳遠遊陸道士客於先生歲暮



以無酒為嘆先生和淵明和張常侍詩云我年六十  
一顏景薄西山是年又有丙子重九詩二首及書東  
臯子傳後祭寶月大師文七月朝雲卒先生有詩悼  
之及作墓誌又於惠州栖禪寺大聖塔葬處作亭覆  
之名之六如亭又除夜前兩日與吳遠遊有記食芋  
說按先生和淵明時運詩丁丑二月十四日白鶴峯  
新居成計其營新居之棟宇必在丙子秋冬之交有  
白鶴峰上梁文

四年丁丑

先生年六十二在惠州正月六日有題劉景文詩後  
按先生和淵明時運詩云丁丑二月十四日白鶴峯  
新居成又與張天和長官書云賤累閏月初可到又  
云承問賤累正月末已到贛上閏月上旬到此也又  
按先生丙子年與毛澤民書云長子授韶州仁化令  
中冬當挈家至此某已買得數畝地在白鶴峰上古  
白鶴觀基也已令斫木陶瓦作屋二十間以此考之

先生長子自冬挈家至閏二月方到惠州按和時運  
詩序長子邁與予別三年矣殷摯諸孫萬里遠來不  
能無欣然所謂二月十四日新居成必閏二月也三  
月先生作三馬圖及作陸道士墓誌五月

紀年錄  
作四月先

生責授瓊州別駕昌化軍安置按志林云余在惠州  
忽被命責儋耳太守方子容自携告身來弔余曰此  
固前定吾妻沈事僧伽甚誠一夕夢和尚來辭云當  
與蘇子瞻同行後七十二日有命今適七十二日矣

豈非前定乎遂寄家於惠州獨與幼子過渡海按子  
由作先生追和淵明詩序云東坡先生謫居儋耳寘  
家羅浮之下獨與幼子過負擔過海又至梧州寄子  
由詩序云吾謫雷被命即行了不相知至梧乃聞其  
尚在藤也旦夕當追及至五月間果遇子由於藤州  
有藤州城下夜起望月寄邵道士詩自藤出陸六月  
與子由相別按先生和淵明移居詩序云丁丑歲余  
謫海南子由亦謫雷州五月十一相遇於藤同行至

雷六月十一日相別渡海有雷州詩八首有行瓊州儋  
耳肩輿坐睡夢中得句覺而遇清風急雨故作是詩有  
古詩一首以七月到儋州有儋州謝表按先生夜夢  
詩序云七月十三日至儋州十餘日矣按子由作先  
生墓誌云紹聖四年先生安置昌化初僦官屋以庇  
風雨有司猶謂不可則買地築室昌化士人畚土運  
甓以助之為屋三間又按先生與程全父推官書云  
初至僦官屋數椽近復遭迫逐不免買地結茅又與

程儒書云近與兒子結茅數椽居之勞費不貲矣賴  
十數學者助作躬泥水之役又云新居在軍城南極  
湫隘以意測之先生居在軍城南與天慶觀鄰又有  
枕榔菴銘云東坡居士謫居儋耳無地可居偃息於  
枕榔林中摘葉書銘以記其處是歲又過海得子由  
書律詩一首

元符元年戊寅

先生年六十三在儋州有過子上元夜赴郡會守舍

作違字韻詩及有讀晉書隱逸傳嶺南氣候說錄溫  
嶠問郭文語又於九月四日遊天慶觀有信道法智  
說是年吳子野來訪先生以詩贈之其序云去歲與  
子野遊逍遙堂因往西山叩羅浮道院宿於西堂今  
歲索居儋耳子野復來相見作詩贈之又有記筮卦  
云戊寅十月五日以久不得子由書憂不去心以周  
易筮之得渙六三又有記諸說云海南以諸為糧糗  
米之十六今歲諸粟不熟以客舶方至市有米也乃

戊寅十月二十一日書又有戊寅十一月一日記海  
漆說

二年己卯

先生年六十四在儋州有己卯正月十三日錄盧仝  
杜子美詩遣懣是時久旱無雨陰翳未快至上元夜  
老書生數人相過曰良月佳夜先生能一出乎先生  
欣然從之步城西入僧舍歷小巷民夷雜揉屠沽紛  
然歸舍己三鼓矣歸錄其事為己卯夜書又有二月



望日書蒼耳說又有儋州詩萬戶不禁酒三年夷識  
翁之句先生丁丑來儋至是將三年矣是歲閏九月  
有瓊州進士姜君弼唐佐自瓊州來儋耳從先生學  
又有作墨說及題程全父詩卷後及有辟穀說又有  
與姜唐佐簡云已取天慶觀乳泉潑建茶之精者念  
非君莫與共之又有十月十五日與姜君簡

三年庚辰

先生年六十五歲在儋州人日間黃河復作詩二首

至上元又和戊寅違字韻詩題後云戊寅上元余在  
儋耳過子夜出守舍作違字韻詩今庚辰上元已再  
期矣家在惠州白鶴峰下過子并婦從余來此又有  
五穀耗地說記唐村老人言及養黃中說姜君弼去  
年閏九月自瓊州來從先生學三月還瓊州有跋姜  
君弼課策及有書柳子厚飲酒讀書二說以贈姜君  
之行按子由樂城集有贈姜君詩序云子瞻嘗贈姜  
君弼兩句詩云滄海何曾斷地脈白袍端為破天荒

它日登科當為子足之必是行以遺之也五月大赦  
量移廉州安置按先生在儋食芋飲水著書以為樂  
作書傳以推明上古之絕學且謙冲下士日與諸黎  
遊無間嘗與軍使張中同訪黎子雲欲釀錢作屋名  
之曰載酒堂又上巳日尋諸生皆出獨與老符秀才  
飲又用過韻與諸生冬至飲酒有愁顏解符老壽耳  
聞吳公之句注云符吳皆坐客必老符秀才與吳子  
野也又按趙德麟侯鯖錄云東坡老人在昌化嘗負

大瓢行歌田畝間所歌蓋哨遍也饒婦年七十二云內  
翰昔日富貴一場春夢坡然之里人呼此媪為春夢  
婆坡一日被酒獨行遍至子雲諸黎之舍作詩云符  
老風流可奈何朱顏減盡鬢絲多投梭每困東鄰女  
換扇惟逢春夢婆是日復見老符秀才言此春夢婆  
之實也凡此數事皆先生海外逸事雖三年居儋耳  
未知在某年中今附於庚辰之歲庶以備觀閱云又  
有儋州與姜君弼書某已得合浦文字又有與少游

書自儋之瓊作峻靈王廟碑云元符三年有詔徙廉州向西而辭六月過瓊州作惠道泉記遂渡海有過

海詩

紀年錄七月四日記渡合浦曰予自海康適合浦連日大雨橋梁盡壞水無津涯自興廉淨行

院下乘小舟至官寨聞自此而西皆漲水無復橋船或勸乘蜃舟並海即白石是年六月晦無月破宿大海中天水相連星河滿天起坐四顧太息曰吾何數乘此險也既濟徐聞復厄於此乎所撰易書論語皆以自隨而世未有別書拊之而歎曰天未欲喪是也吾儕必濟又有烏喙詩序云余

東僭耳得犬曰烏喙予遷合浦過澄邁泗而濟戲作是詩渡海到廉州謝表有許承恩而內徙之句在廉

州有廉州龍眼質味殊絕可敵荔枝詩又有題少游  
學書云庚辰八月二十四日書於合浦清樂軒及記  
蘇佛兒語別廉守張左藏詩此皆在廉州所作詩也  
又有瓶笙詩序云庚辰八月二十八日劉幾仲餞別  
東坡中觴聞笙簫聲又有與鄭靖老書云到廉廉守  
云公已行矣志林未成草得書傳十三卷某留此過  
中秋或至月末乃行作木柅下水厓容藤至梧與邁  
約殷家至梧相會迨亦至惠矣是歲又有移永州之

命按先生謝提舉成都府玉局觀表云先自昌化貶  
所移廉州又自廉州移舒州節度副使永州居住行  
至英州復朝奉郎提舉成都府玉局觀任便居住經  
由廣州有將至廣州用過字韻寄迨邁二子詩時朱  
行中舍人知廣州先生有簡與朱行中云欲服帽請  
見先令咨稟廣州少留而行考先生題廣慶寺云東  
坡居士渡海北還吳子野何崇道穎堂通三長老黃  
明達李公弼林子中自番禺追餞至清遠峽同遊廣

陵寺乃元符三年十一月十五日自此舟行清遠過  
英州拜玉局之除有何公橋詩過韶州有次韻狄守  
李倅詩及作九成臺銘是年過嶺作詩寄子由有七  
年來往我何堪之語蓋先生甲戌責惠州已而過海  
至是為七年矣次年正月五日過南安軍計先生度  
嶺必已歲除

徽宗建中靖國元年辛巳

先生年六十六度嶺北歸作南華長老題名記按題



中載石鍾山記云建中靖國元年正月五日自南陵  
還過南安軍舊法掾吳君示舊所作石鍾山銘為題  
其末乃知先生首正過南安必矣又有過嶺至南安  
作一首正月到虔州有與錢濟明書云某已到虔州  
二月十間方離此又和舊所作鬱孤臺詩有虔州士  
人孫志舉從先生遊先生有和遲韻贈志舉先輩云  
我從海外歸喜及崆峒春又有和志舉見贈云洒掃  
古玉局香火通帝闕又用前韻謝崔次之見過云自

我遷嶺外七見槐火春及發虔州過吉州永和鎮清  
都觀有謝道士自言丙子生求詩為賦一首及為作  
贊并寫清都臺三字中途又為南安軍作學記寫海  
外所作天慶觀乳泉賦四月舟行至豫章彭蠡之間  
遇成國程夫人忌日廼寫圓通偈云行當施廬山有  
道者又有與胡仁修書云旦夕到儀真暫令邁一至  
常五月行至真州瘴毒大作病暴下中止於常州按  
先生寄朱行中詩有至今不貪寶凜然照塵寰之句

先生注云前一日夢中作此詩寄行中覺而記之自  
不曉接近日曾端伯百家詩選至朱行中事迹云東  
坡夢中寄朱行中一篇南遷絕筆也先生文如萬斛  
泉源而乃止於夢中寄行中之作此正絕筆獲麟之  
義惜哉六月上表請老以本官致仕七月丁亥卒於  
常州實七月二十八日嗚呼先生文章為百世之師  
而忠義尤為天下大開加之好賢樂善常若不及是  
宜計聞之日士民惜哲人之萎朝野嗟一鑑之逝皆

出於自然之誠不可以強而致也以次年閏六月葬


於汝州郟城縣釣臺鄉上瑞里

紀年錄七月疾頗革折簡錢世雄云昨夜

齒中出血如蚯蚓者無數若專是熱毒根源不淺即今諸藥盡却惟取人參茯苓麥冬淪湯渴即飲之莊生云在宥天下未聞治天下也三物可謂在宥矣此而不愈則天也徑山老惟琳來說偈答曰與君皆丙子各已三萬日一日一千偈電往那能詰大患緣有身無身則無疾平生笑摩什神呪真浪出琳問神呪事索筆書昔鵝摩羅什病亟出西域神呪三番令弟子誦以免難不及事而終併出一帖云某嶺海萬里不死而歸宿田里有不起之憂非命也耶蓋絕筆於此後二日殆將屬纊而聞觀先離琳叩耳大聲云瑞明宜勿忘公云西方不無但箇裏着力不得世雄云固先生平時踐履至此更須着力曰着力即差語絕

而逝

按五羊王氏年譜綜其大端僊谿傳氏紀年核於月  
日要亦互有得失今以年譜為主而紀年之可取者  
節抄分注以備參考并瑕存瑜庶幾全璧年譜有數  
條誤處如臘日遊孤山訪僧詩應在辛亥而誤入壬  
子遊風水洞諸詩應在癸丑而誤入甲寅又見顧秀  
才談惠州風物之美詩應在南遷度嶺而誤入北歸  
之類今俱為刪正其詩文無大關係而年譜未載者  
雖歲月可考不更增入以年譜與譜詩異也長蘅識



東坡先生年譜

欽定四庫全書

集部

施註蘇詩卷二

詳校官然吉士臣李傅熊

檢討臣何思鈞覆勘

覆校官中書臣宋 銘

校對官主事臣龔敬身

謄錄監生臣黃 浩

欽定四庫全書

施註蘇詩卷一

宋 蘇軾 撰

施元之原註

武進邵長蘅刪補

詩四十七首

起嘉祐辛丑十二月赴鳳翔任盡  
壬寅在鳳翔作 施註缺今補

辛丑十一月十九日既與子由別於鄭州西門



之外馬上賦詩一篇寄之

不飲胡為醉兀兀此心已逐歸鞍發  
歸人猶自念庭闈  
今我何以慰寂寞登高回首坡隴隔  
惟見烏帽出復沒  
苦寒念爾衣裘薄獨騎瘦馬踏殘月  
路人行歌居人樂  
僮僕怪我苦悽惻亦知人生要有別  
但恐歲月去飄忽  
寒燈相對記疇昔夜雨何時聽蕭瑟  
君知此意不可忘  
慎勿苦愛高官職

公自注嘗有夜雨對牀之言故云爾

杜詩烏帽塵拂青螺粟韋應物與元常全真二生詩那知風雨夜復此對牀眠王注子由與先生在懷遠驛嘗

讀韋詩至此句惻然感之乃相約早退共為閒居之樂  
其後子由與先生彭城相會有詩曰逍遙堂後千尋木  
長送中宵風雨聲悵喜對牀尋舊約不知漂泊在彭城  
先生在東府雨中作示子由詩有曰對牀定悠悠夜雨  
今蕭瑟蓋皆感  
歎追舊之言也

和子由澠池懷舊

漢書弘農郡澠池縣注景  
帝中二年初徙萬家為縣

人生到處知何似應似飛鴻踏雪泥泥上偶然留指爪  
鴻飛那復計東西老僧已死成新塔壞壁無由見舊題  
往日崎嶇還記否路長人困蹇驢嘶公自注往歲馬死  
於二陵騎驢至澠  
池

賈誼弔屈原賦騰駕罷牛駮塞驢兮杜  
詩東家塞驢許借我泥滑不敢騎朝天

次韻和劉京兆石林亭之作石本唐苑中物散

流民間劉購得之

京兆府即長安也劉京兆乃劉敞字原父

都城日荒廢往事不可還唯餘故苑石漂散向

一作尚

人間公來始購蓄不憚道里艱忽從塵埃中來對冰  
雪顏瘦骨拔凜凜蒼根漱潺潺唐人唯竒章好石古  
莫攀盡令屬牛氏刻鑿紛班班嗟此本何常聚散實  
循環人失亦人得要不出區寰君看劉李末不能保

河關況此百株石鴻毛於太山但當對石飲萬事付等閒

河圖括地象地以石為骨白樂天太湖石記今丞相奇章公嗜石於此物獨不謙讓東第南墅列而置之以甲乙丙丁品之各刻于石陰曰牛氏石甲之上丙之中乙之下按奇章公牛僧孺也家語楚共王出遊亡其烏號之弓左右請求之王曰止也楚人失弓楚人得之又何求焉孔子聞之曰惜乎其不廣也宜曰人遺弓人得之而已何必楚也王注劉指漢李指唐也史記魏王豹至國即絕河關司馬遷與任安書死有重於太山或輕於鴻毛

壬寅二月有詔令郡吏分往屬縣減決囚禁自十三日受命出府至寶雞號郿盤屋四縣既畢

事因朝謁太平宮而宿於南谿谿堂遂並南山  
而西至樓觀大秦寺延生觀仙游潭十九日乃  
歸作詩五百言以記凡所經歷者寄子由

遠人罹水旱王命釋俘囚分縣傳明詔循山得勝遊蕭  
條初出郭曠蕩實消憂薄暮來孤鎮登臨憶武侯崢嶸  
依絕壁蒼茫瞰奔流半夜人嘯急橫空火氣浮天遥殊  
不辨風急已難收曉入陳倉縣猶餘賣酒樓煙煤已狼  
藉吏卒尚呀咻

公自注十三日宿武城鎮即俗所謂石  
鼻寨也云孔明所築是夜二鼓寶雞火

作相去三十里  
而見於武城

雞嶺雲霞古龍宮殿宇幽

公自注縣有雞爪峰龍宮

寺

南山連大散歸客走

音奏

吾州欲往安能遂將還為少

留回趨西虢道卻渡小河洲聞道磻溪石猶存渭水頭

蒼崖雖有迹大釣本無鉤

公自注十四日自寶雞行至虢聞太公磻溪石在縣東南

十八里猶有投竿晚餌兩膝所著之處

東去過郿塢孤城象漢劉

公自注十五日

至郿縣縣有董卓城象長安俗謂之小長安

誰言董公健竟復伍孚讎白刃

俄生肘黃金謾似邱平生聞太白一見駐行騶鼓角誰

能試風雷果致不巖崖已奇絕冰雪更凋鏤春早憂無

麥山靈喜有湫蛟龍懶方睡餅罐小容偷

公自注是日晚自鄆起至

青秋鎮宿道過太白山相傳云軍行鳴鼓角過山下輒致雷雨山上有湫甚靈以今歲旱方議取之

二曲

林泉勝三川氣象侔近山麤麥早臨水竹簞修

公自注十六日

至盤屋以近山地美氣候殊早縣有官竹園十數里不絕

先帝膺符命行宮畫冕旒

侍臣簪武弁女樂抱笙篴祕殿開金鎖神人控玉蚪黑

衣橫巨劍被髮凜雙眸

公自注十七日寒食自盤屋東南行二十餘里朝謁太平宮二

聖御容此宮乃太宗皇帝時有神降於道士張守真以告受命之符所為立也神封翊聖將軍有殿邂逅

逢佳士相將弄綵舟投篙披綠荇濯足亂清溝晚宿南

谿上森如水國秋遶湖栽翠密終夜響颼颼

公自注是日與監宮

張果之汎舟南谿遂留宿于谿堂

冒曉窮幽邃操戈畏炳彪

公自注十八日循終

南而西縣尉以甲卒見送或云近官竹園往往有虎

尹生猶有宅老氏舊停輶問

道遺蹤在登仙往事悠馭風歸汗漫閱世似蜉蝣羽客

知人意瑤琴繫馬鞦不辭山寺遠來作鹿鳴啣帝子傳

聞李崑堂髣像緹輕風幃幔卷落日髻鬟愁入谷驚

音浴

蒙密登坡費挽摟亂峰巉似梨一水澹如油中使何年

到金龍自古授千重橫翠石百丈見游鯨

音鯢

最愛泉鳴



洞初嘗雪入喉滿餅雖可致洗耳歎無由

公自注是日  
游崇聖觀俗

所謂樓觀也乃尹喜舊宅山脚有授經臺尚在遂與張  
杲之同至大秦寺早食而別有太平宮道士趙宗有抱  
琴見送至寺作鹿鳴之引乃去又西至延生觀觀後上  
小山有唐王真公主修道之遺迹下山而西行十數里  
南入黑水山谷中有潭名仙游潭上有寺三倚峻峯面  
清溪樹林深翠怪石不可勝數潭水以繩絀石數百尺  
不得其底以瓦礫投之翔揚徐下食頃乃不見其清澈  
如此遂宿於中興寺寺中有玉女洞洞中有飛泉甚甘  
明日以泉二餅歸至  
郡又明日乃至府忽憶尋蟪培方冬脫鹿裘山川良

甚似水石亦堪儔惟有泉傍飲無人自獻酬

公自注昔  
與子由游

蟪培時方冬洞中溫溫如二三月楚辭遠游下崢嶸而  
無地兮上寥廓而無天注崢嶸深遠貌文選刻削崢嶸

王注蒼茫字古人用皆平聲先生用作仄聲蒼字廣韻音羸朗而茫字上聲之莽去聲之莽皆不收不知先生用之所出地志載三秦記陳倉以山得名山有石雞與山雞不別趙高燒山山雞飛去而石雞不去晨鳴山頭聞三十里蓋玉雞也唐至德二載更名寶雞史記封禪書秦文公獲若石云於陳倉北阪城祠之其神來常以夜光輝若流星從東南來集於祠城則若雄雞其聲殷云野雞夜雉以一牢祠命曰陳寶按雞爪峰蓋以此得名王注大散關秦蜀通途又西號號叔所封平王東遷號徙上陽故謂之西號後漢董卓傳築塢於郿高厚七丈號曰萬歲塢又塢中珍藏有金二三萬斤銀八九萬斤錦綺奇玩積如邱山袁紹傳卓議廢立紹勃然曰天下健者何必董公又卓傳越騎校尉伍孚忿卓兇毒懷珮刀刺之不中左右執孚孚大言曰恨不得磔裂姦賊於都市又王允與呂布謀誅卓李肅以戟刺之裒甲不入卓驚呼呂布何在布曰有詔討賊遂殺卓三十六洞

天記第十一太白山洞周回五百里三秦謠武功太白  
去天三百逕賦木不凋鏤王注偷字韻蓋方言取龍水  
謂之偷湫也西京賦右極盤屋并卷鄴之下李善注  
盤屋山名盤音周屋音質寰宇記山曲曰盤水曲曰屋  
故云二曲王注古謂伊洛河為三川唐以劍南東西及  
山南西道為三川釋名篋篋師延所作風俗通武帝禱  
祠太一后土令樂人侯調作坎侯言聲坎坎應節也因  
其姓號坎侯蘇林注作瑩篋李賀瑩篋引二十三絲動  
然皇司馬相如賦乘鑣象六玉蚪劉焯曰翊聖像皆被  
髮跣足仗劍擾龍相承舊矣廣雅小風曰颼涼風曰颼  
周易大人虎變其文炳也說文虎文曰彪史記老莊傳  
老子見周之衰乃遂去至闕關令尹喜曰子將隱矣彊  
為我著書乃著書言道德之意五千餘言而去列子馭  
風而行淮南子有若士者謂盧敖曰子處矣吾與汗漫  
期于九垓之上詩曹風蟋蟀之羽毛傳渠畧也朝生夕  
死王注帝子唐玉真公主睿宗之女始封長昌縣主天

寶三年上言妻高宗之孫睿宗之女陛下之女弟於天下不為賤何必名係主號資湯沐然後為貴請入數百家之產延十年之命帝許之與金仙公主皆為道士青城山記玉真公主肅宗之姑也築室大人觀玉真金仙二宮主真容見在女仙列傳西王母姓緤其所居有玄碧之堂唐王建溫門山詩曉入溫門山羣峰亂如戟白樂天詩噴時千點雨澄處一泓油東齋記事道家有金龍玉簡學士院撰文具一歲中齋醮投於名山洞府金龍以銅制玉簡以階石制莊子與惠子游於濠上儵魚出遊沈約詩百丈見游鱗唐張又新水記峽州扇子峽石中哭而洩水獨清冷石狀如龜頭俗謂蝦蟆石其水煎茶為第一

### 太白山下早行至橫渠鎮書崇壽院壁

馬上續殘夢不知朝日昇  
亂山橫翠幃落月澹孤燈  
奔

走煩郵吏安閒愧老僧再游應眷眷聊亦記吾曾

留題延生觀後山上小堂

王注觀後上小山有堂是唐玉真公主修

道遺迹本朝端拱元年奉勅賜此額

溪山愈好意無厭上到巉巉第幾尖深谷野禽毛羽怪  
上方仙子鬢眉纖不慙弄玉騎丹鳳應逐嫦娥駕老蟾  
澗草巖花自無主晚來胡蝶入疎簾

列仙傳蕭史善吹簫秦穆公以女弄玉妻焉遂教弄玉吹簫作鳳鳴一旦弄玉乘鳳蕭史乘龍昇天而去淮南子羿得不死之藥於西王母姮娥竊之奔月姮娥羿妻也乾鑿度蟾蜍體就穴鼻始明注穴鼻兔也

留題仙遊潭中興寺東有玉女洞洞南有馬融  
讀書石室過潭而南山石益奇潭上有橋畏其

嶮不敢渡

終南圖經讀書臺  
在縣城西一百步

清潭百尺皎無泥山木陰陰谷鳥哢蜀客曾遊明月峽  
秦人今在武陵溪獨攀書室窺巖竇還訪仙姝歎石闥  
猶有愛山心未至不將雙腳踏飛梯

王注明月峽在古巴郡今在忠涪二州之境石壁有圖  
孔形如滿月蜀客則先生自謂武陵溪用桃源漁人事  
詳第六卷風水洞詩注後漢馬融傳融扶風茂陵人  
京兆摯恂以儒術教授隱於南山之陰融從其游學

石鼻城

注見前

平時戰國今無在陌上征夫自不閒  
北客初來試新險蜀人從此送殘山  
獨穿暗月朦朧裏愁渡奔河蒼茫間  
漸入西南風景變道邊修竹水潺潺

王注戰國指蜀魏也諸葛亮築此城以拒郝昭

礮溪石

注見前

墨突不暇黔孔席未嘗煖安知渭上叟  
跪石留雙胛一朝嬰世故辛苦平多難  
亦欲就安眠旅人譏客懶

淮南子墨子無黔突孔子無煖席史記齊世家武王封  
師尚父於齊營邱東就國道宿行遲遲旅之人曰吾聞  
時難得而易失客寢甚安殆非就國  
者也太公聞之夜衣而行黎明至國

郿塢

注見前

衣中甲厚行何懼塢裏金多退足憑畢竟英雄誰得似  
臍脂自照不須燈

後漢董卓傳尸卓於市天時始熱卓素充肥脂流  
於地守尸吏然火置卓臍中光明達曙如是積日

樓觀

公自注秦始皇立老子廟  
於觀南晉惠始修此觀

門前古碣卧斜陽閱世如流事可傷長有幽人悲晉惠



強修遺廟學秦皇丹砂久窖井水赤白水誰燒厨竈香  
聞道神仙亦相過只疑田叟是庚桑

抱朴子臨沱縣有廖氏世老壽後移居子孫輒殘折他  
人居其故宅復累世壽疑其井水赤乃掘井左右得古  
人埋丹砂數十斛丹汁入井是以飲水而壽陶隱居引  
仙經术能除惡氣莊子老聃之後有庚桑楚者徧得老  
聃之道北居  
畏壘之山

九月二十日微雪懷子由第二首

岐陽九月天微雪已作蕭條歲暮心短日送寒砧杵急  
冷官無事屋廬深愁腸別後能消酒白髮秋來已上簪

近買貂裘堪出塞忽思乘傳

知總切

問西琛

杜子美詩廣文先生官獨冷又詩白髮不勝簪漢書乘傳注師古曰傳者若今之驛古以車謂之傳車其後又單置馬謂之驛騎詩慄彼淮夷來獻其琛

江上同舟詩滿篋鄭西分馬涕垂膺未成報國慙書劍  
豈不懷歸畏友朋官舍度秋驚歲晚寺樓見雪與誰登  
遙知讀易東牕下車馬敲門定不謦

詩豈不懷歸畏此簡書左傳引逸詩豈不欲往畏我友朋

病中聞子由得告不赴商州三首

王注子由與先生同舉賢

科子由以訐直得下第除商州推官而王介甫猶不肯撰辭告未即下故先生自去年十月先赴鳳翔至今年秋子由方告下以老泉傍無侍子奏乞養親三年此所以得告而不起也

病中聞汝免來商旅鴈何時更著行遠別不知官爵好思歸苦覺歲年長著書多暇真良計從宦無功謾去鄉惟有王城最堪隱萬人如海一身藏

近從章子聞渠說

公自注章子惇也

苦道商人望汝來說客有

靈慙直道逋翁久沒厭凡才夷音僅可通名姓癭俗無

由辨頸顚答策不堪宜落此上書求免亦何哉

王注通翁四皓也避秦隱於商山白樂天詩漢容黃綺為通客李商隱商於詩割地張儀詐謀身綺季長歐陽

公汝癭詩無  
由辨肩顚

辭官不出意誰知敢向清時怨位卑萬事悠悠付杯酒  
流年冉冉入霜髭策曾忤世人嫌汝易可忘憂家有師  
此外知心更誰是夢魂相覓苦參差

病中大雪數日未嘗起觀醵令趙薦以詩相屬  
戲用其韻答之

經旬卧齋閣終日親劑和不知雪已深但覺寒無奈一作

那飄蕭牕紙一作紙牕

明堆壓簷板墮

公自注闕中皆以板為簷

風颭助

凝列幃幔困掀

一作軒

簋惟思近醇醪未敢窺璨瑳何時

反炎赫卻欲躬白磨誰言坐無氈尚有裘充貨西鄰歌  
吹發促席寒威挫崩騰踏成逕繚繞飛入座人歡瓦先  
融飲雋餅屢卧嗟予獨愁寂空室自困圯欲為後日賞  
恐被遊塵泥寒更報新霽皎月懸半破有客獨苦吟清  
夜默自課詩人例窮蹇秀句出寒餓何當暴霜雪庶以

# 躡郊賀

魏都賦著馴風之醇釀注以酒喻政王注璅瑳以玉比雪之明也後漢馮衍妻妒悍不畜媵妾兒女自操井臼以言勞則體中生熱也杜子美贈鄭廣詩才名三十年坐客寒無羶西京雜記司馬相如初與文君還成都居貧愁懣以所著鸛鸛裘就市人楊昌貴酒與文君為歡左傳士文伯謂投壺之中曰中雋歐陽詩不覺長緝卧墻曲韓退之詩勿使塵泥浼又新月憐半破杜詩詩家秀句傳寒餓王注郊賀孟郊李賀也

歲晚相與饋問為饋歲酒食相邀呼為別歲至  
除夜達旦不眠為守歲蜀之風俗如是余官於  
岐下歲暮思歸而不可得故為此三詩寄子由

饋歲

農功各已收，歲事得相佐。為歡恐無及，倣物不論貨。山川隨出產，貧富稱小大。寘盤巨鯉橫，發籠去聲雙兔卧。富人事華靡，綵繡光翻座。貧者愧不能，微摯出春磨。官居故人少，里巷佳節過。亦欲舉鄉風，獨唱無人和。

詩商頌歲事來辟左傳以相輔佐王符潛夫論富者競欲相過貧者恥不逮及也

別歲

故人適千里，臨別尚遲遲。人行猶可復，歲行那可追。問

歲安所之遠在天一涯已逐東流水赴海歸無時東鄰  
酒初熟西舍彘亦肥且為一日歡慰此窮年悲勿嗟舊  
歲別行與新歲辭去去勿回顧還君老與衰

古詩各在天一涯古樂府  
百川東到海何時復西歸

### 守歲

欲知垂盡歲有似赴壑蛇修鱗半已沒去意誰能遮况  
欲繫其尾雖勤知奈何兒童彊不睡相守夜謹一作謹譁

晨雞且勿唱更鼓畏添撾坐久燈燼落起看北斗斜明



年豈無年心事恐蹉跎努力盡今夕少年猶可誇

晉書賈皇后云繫狗  
當繫頸今反繫其尾

和子由踏青

子由踏青詩序眉之東門十數里有山曰墓頤山上有亭榭松竹山

下臨大江每正月八日士女相與  
遊嬉飲酒於其上謂之踏青也

春風陌上驚微塵游人初樂歲華新人間正好路傍飲  
麥短未怕游車輪城中居人厭城郭喧闐曉出空四鄰  
歌鼓驚山草木動簞瓢散野鳥鳶馴何人聚衆稱道人  
遮道賣符色怒嗔宜蠶使汝蠶如甕宜畜使汝羊如麇

路人未必信此語強為買服襪新春道人得錢徑沽酒  
醉倒自謂吾符神

太平廣記園客者濟陰人嘗種五色香草積十年服其  
實一日有五色蛾止其旁客收而畜之至蠶時有女夜  
半至自稱客妻道蠶之狀客與俱蠶得一百二十頭蠶  
皆如甕每緣一頭六十日乃盡遂俱仙王注爾雅曰麤  
大羊杜預奏事曰臣前在南聞魏興北山有野羊大者  
數千百斤試令求之牝牡各得一豈爾雅所謂麤者乎  
麤與麤皆從鹿挨傍押韻成都古今記三月三日太守  
出北門宴學射山蓋張百子以是日上升即此地也男  
覲女巫會於此寫符篆以鬻人云宜  
田蠶辟災疫佩者戴者信以為然

### 和子由蠶市

子由詩序眉之二月望日鬻蠶  
罷於市因作樂縱觀謂之蠶市

蜀人衣食常苦艱蜀人游樂不知還千人耕種萬人食  
一年辛苦一春閒閒時尚以蠶為市共忘辛苦逐欣歡  
去年霜降斫秋荻今年箔積如連山破瓢為輪土為釜  
爭買不翅金與紬憶昔與子皆童州音年年廢書走市  
觀市人爭誇鬪巧智一作智巧野人喑啞遭欺謾詩來使我  
感舊事不悲去國悲流年

王注荻箔乃薦蠶之具瓢輪土釜乃繰絲之物詩齊風總角音兮注束髮兒

和子由苦寒見寄

人生不滿百一別費三年三年吾有幾  
棄擲理無還長恐別離中摧我鬢  
與顏念昔喜著書別來不成篇  
細思平時樂乃為憂所緣  
吾從天下士莫如與子歡  
羨子久不出讀書蟲生氈  
丈夫重出處不退要當前  
西羗鮮仇隙猛士憂塞壩  
而宣切廟謀雖不戰  
鹵意久欺天山西良家子  
錦緣貂裘鮮千金買戰馬  
百寶粧刀鏢何時逐汝去  
與鹵試周旋

漢書趙充國傳元康元年先零與諸羗種豪二百餘人  
解仇交質盟誓申屠嘉傳太上皇廟壝垣注宮外垣餘

地也塙塙全按塞塙塞垣也又六郡良家子皆習騎射又山西出將左傳晉文公謂楚子曰左執鞭弭右屬橐韃以與君周旋

和子由論書

吾雖不善書曉書莫如我苟能通其意常謂不學可貌妍容有曠同壁美何妨橢端莊襍流麗剛健含婀娜好之每自譏不謂子亦頗書成輒棄去繆被旁人裏體勢

本闊落結束入細磨子詩亦見推語重未敢荷邇來又

學射力薄愁官寄

公自注官箭十二把吾能十一把箭耳

多好竟無成不

精安用夥何當盡屏去萬事付懶惰吾聞古書法守駿  
莫如跛世俗筆若驕衆中強鬼賊鍾張忽已遠此語與  
時左

莊子天運篇西施病心而曠其里爾雅鯖小而橢注貝  
狹而長曰橢班彪王命論么麼不及數子注細小曰麼  
漢書陳涉傳夥涉之為王沈沈者注楚人謂多為夥說  
文馬搖頭曰駭王注鬼賊不安帖兒鍾張鍾繇張芝也

記所見開元寺吳道子畫佛滅度以答子由

名畫

記吳陽翟人工畫初名道子玄宗  
改名道玄下筆有神官至寧王友

西方真人誰所見衣被七寶從雙狻音酸當時修道頗辛

苦柏生兩肘鳥

一作鳥

巢肩初如濛濛隱山玉漸如濯濯

出水蓮道成一旦就空滅奔會四海悲人天翔禽哀響  
動林谷獸鬼躑躅淚迸泉龐眉深目彼誰子遶牀彈指  
性自圓隱如寒月墮清晝空有孤光留故躔春遊古寺  
拂塵壁遺像久此霾香煙畫師不復寫名姓皆云道子  
口所傳從橫固已蔑孫鄧有如巨鰐吞小鮮來詩所誇  
孰與此安得携挂其旁觀

穆天子傳獲狴日行五百里郭璞注獅子也一名虺獸  
中之王也傳燈錄佛於雪山入定有野鵲於佛頂置巢

時去時來大智度論曰佛在陰菴羅雙樹間入般涅槃  
卧北首大地震動諸三學人僉然不樂郁伊交涕諸無  
學人但念諸法一切無常杜詩淚下如迸泉王注月墮  
清畫以譬佛之滅度光留故矐以譬佛之雖寂滅而猶  
在圖畫見開志孫知微字太古通義彭山人每畫聖像  
必齋戒疏淪方始援筆鄧名隱物類相感志南海有鰐  
魚其狀若鼉四足長六七尺有齒如劍老子治大國若烹小鮮

### 和子由寒食

寒食今年二月晦樹林深翠已生煙遶城駿馬誰能借  
到處名園意盡便但挂酒壺那計盞偶題詩句不須編  
忽聞啼鵲驚羈旅江上何人治廢田



和劉長安題薛周逸老亭周善飲酒未七十而

致仕

王注劉長安劉敞  
原父也薛周莫考

近聞薛公子早退驚長流買園招野鶴鑿井動潛蚪自  
言酒中趣一斗勝涼州翻然拂衣去親愛挽不留隱居  
亦何樂素志庶可求所亡嗟無幾所得不啻酬青春為  
君好白日為君悠山鳥奏琴筑野花弄閑幽雖辭功與  
名其樂實素侯至今清夜夢尚驚冠壓頭誰能載美酒  
往以大白浮之子雖不識因公可與遊

蜀都賦下高鵠出潛蚪續漢書扶風孟陀以蒲萄酒一斗遺張襲即得涼州刺史晉書鄧攸傳吳人歌之曰鄧侯挽不留謝令推不去史貨殖傳今有無秩祿之奉爵邑之入而樂與之比者命曰素封又千金之家比一都之君巨萬者乃與王者同樂劉向說苑魏文侯與大夫飲使公乘不仁為觴政曰飲不盡者浮以大白

### 中隱堂詩

井序

岐山宰王君紳其祖故蜀人也避亂來長安而遂家焉其居第園圃有名長安城中號中隱堂者是也予之長安王君以書戒其子弟邀予遊且乞詩

甚勤因為作此五篇

前地理志京兆尹縣十二其一曰長安高帝五年置惠帝

元年初城  
六年成

去蜀初逃難遊秦遂不歸園荒喬木老堂在昔人非鑿  
石清泉激開門野鶴飛退居吾久念長恐此心違

徑轉如修蟒坡垂似伏鼃樹從何代有人與此堂高好  
古嗟生晚偷閒厭久勞王孫早歸隱塵土汙君袍

劉安招隱士王孫遊兮不歸陸  
機詩京洛多風塵素衣化為緇

二月驚梅晚幽香此地無依依慰遠客皎皎似吳姝不  
恨故園隔空嗟芳歲徂春深桃杏亂笑汝益羈孤

韓退之詩二月初驚見草芽  
杜子美詩丹橘黃柑此地無

翠石如鸚鵡何年別海壖貢

一作來

隨南使遠載壓渭舟

偏已伴喬松老那知故國遷金人解辭漢汝獨不潸然

廣韻壖江河邊地李賀金銅仙人辭漢歌  
序官官既圻盤仙人臨載乃潸然泣下

都城更幾姓到處有殘碑古隧埋蚪蚪崩崖露伏龜安  
排壯亭榭收拾費金貲岫嶠何須到韓公浪自悲

西都賦三成帝畿注周秦漢也古文四聲韻序蚪斗書  
古文也所謂蒼頡本體形多頭麤尾細腹壯團圓似水  
蟲之蚪蚪隋志五品以上立碑螭首龜趺韓退之詩岫  
嶠山尖神禹碑字青石赤形摹竒又云我來咨嗟涕連

而千搜萬索何處有  
森森綠樹猿猱悲

鳳翔八觀并序

鳳翔八觀詩記可觀者八也昔司馬子長登會稽  
探禹穴不遠千里而李太白亦以七澤之觀至荆  
州二子蓋悲世悼俗自傷不見古人而欲一觀其  
遺蹟故其勤如此鳳翔當秦蜀之交士大夫之所  
朝夕往來此八觀者又皆跬步可至而好事者有  
不能徧觀焉故作詩以告欲觀而不知者

# 石鼓歌

冬十二月歲辛丑我初從政見魯叟舊聞石鼓今見之  
文字鬱律蛟蛇走細觀初以指畫肚欲讀嗟如箝在口  
韓公好古生已遲我今況又百年後強尋偏傍推點畫  
時得一二遺八九我車既攻馬亦同其魚維鱖貫之柳

公自注其詞云我車既攻我馬亦同又云其魚維何維  
鱖維鯉何以貫之維揚與柳惟此六句可讀餘多不可

通古器縱橫猶識鼎衆星錯落僅名斗糝糊半已似癡  
胝詰曲猶能辨跟肘娟娟缺月隱雲霧濯濯嘉禾秀良

莠漂流百戰偶然存獨立千載誰與友上追軒頡相唯

諾下揖

一作挹

冰斯同轂轂

轂邱侯切轂乃侯切

憶昔周宣歌鴻鴈

當時籀史變蝌蚪厭亂人方思聖賢中興天為生耆耆

東征徐鹵闕虓虎北伏

一作伐

犬戎隨指嗾

蘇后切

象胥襍

省貢狼鹿方名聯翩賜圭卣遂因鼓鼙思將帥豈為考

擊煩矇瞍何人作頌比崧高萬古斯文齊岫嶺勲勞至

大不矜伐文武未遠猶忠厚欲尋年歲無甲乙豈有名

字記誰某自從周衰更七國竟使秦人有九有掃除詩

書誦法律授棄俎豆陳鞭杻當年何人佐祖龍上蔡公  
子牽黃狗登山刻石頌功烈後者無繼前無偶皆云皇  
帝巡四國烹滅彊暴救黔首六經既已委灰塵此鼓亦  
當遭擊掊傳聞九鼎淪泗上欲使萬夫沈水取暴君縱  
欲窮人力神物義不汙秦垢是時石鼓何處避無乃天  
工令鬼守興亡百變物自閒富貴一朝名不朽細思物  
理坐歎息人生安得如汝壽

歐陽集古錄石鼓久在岐陽初不見稱於世至唐人始  
盛稱之而韋應物以為周文王之鼓至宣王時刻爾韓



退之直以為宣王之鼓今在鳳翔縣孔子廟鼓有十先  
時散棄於野鄭餘慶始置於廟而亡其二皇祐四年向  
傳師求於民間得之十鼓乃足其文可見者四百六十  
有五磨滅不可識者過半然其可疑者四退之好古不  
妄者予姑取以為信耳至於字畫亦非史籀不能作也  
西京賦隱麟薜律甘泉賦雷薜律於巖穴唐虞世南學  
書常於被下以指畫壯韓退之苦寒詩濁醪沸入喉口  
角如銜箝又石鼓歌嗟予好古生苦晚對此涕淚雙滂  
沱王注軒頡軒轅蒼頡水斯李斯李陽水也頡為黃帝  
史因觀鳥迹始作書契古文是也周宣王時史籀著大  
篆十五篇與古稍異謂之籀書秦相李斯取籀文或頗  
省改謂之小篆焚先典而古文絕矣漢魯共王壞孔子  
宅得尚書春秋論語孝經時以不復知古文故謂之蝌  
蚪書諸山刻石荆玉璽文及銅人銘皆斯所書謂之玉  
筋體唐李陽冰獨得斯用筆意論者謂冰愈於斯也小  
雅鴻鴈詩序曰美宣王也鄭箋承厲王哀亂之敝而起

興復先王之道以安集衆民也大雅常武詩省此徐土  
又進厥虎臣闕如虓虎國語穆王將征犬戎祭公謀父  
諫不聽遂征之得四白狼四白鹿以歸左傳宣二年晉  
侯飲趙盾酒伏甲將攻之公嗾夫獒焉說文使犬聲也  
周官象胥掌蠻貊閩貉戎狄之國使掌傳王之言而諭  
說焉大雅江漢詩王命召虎釐爾圭瓚秬鬯一卣方方  
叔也記聽鼓鼙之聲則愚將帥之臣大雅崧高詩毛傳  
尹吉甫美宣王也岫嶺注見前秦始皇本紀始皇三十  
六年秋使者從關東夜過華陰平舒道有人持璧遮使  
者曰為吾遺瀉池君明年祖龍死使者問其故忽不見  
使者奉璧具以聞始皇嘿然良久曰山鬼固不過知一  
歲事也退言曰祖龍者人之先也史記李斯傳斯出獄  
與其中子俱執顧謂其中子曰吾欲與若復牽黃犬俱  
出上蔡東門逐狡兔豈可得乎始皇本紀二十八年始  
皇東行郡縣上鄒嶧山刻石頌秦德又南登瑯邪作瑯  
邪臺刻石頌秦德二十九年登之罘刻石刻詞有曰烹

滅强暴振救黔首又始皇還過彭城齋戒禱祠欲出周  
鼎泗水使千人浚水求之弗得莊子逍遙遊吾為其無  
用而掊之注擊而碎之也韓石鼓歌  
雨淋日炙野火燎鬼物守護煩搗呵

詛楚文

公自注碑獲於開元寺土下今在太  
守便廳秦穆公葬於雍橐泉祈年觀

下今墓在開元寺之東南數十步則寺豈  
祈年之故基耶淮南王遷於蜀至雍道病  
卒則雍非長安  
此乃古雍也

崢嶸開元寺髣髴祈年觀舊築掃成空古碑埋不爛詛  
書雖可讀字法嗟久換詞云秦嗣王敢使祝用瓚先君  
穆公世與楚約相捍質之於巫咸萬葉期不叛今其後

嗣王乃敢搆多難剗胎殺無罪親族遭圍絆計其所稱  
訴何啻祭紂亂吾聞古秦俗面詐背不汗豈惟公子卬

社鬼亦遭謾遼哉千載後發我一笑

一作笑 祭

王注問詛楚文於學古文者云有數本其文皆同惟神  
名異開元寺下所得乃詛於巫咸神者是數本中唯巫  
咸之文筆法最精其家無之唯有此詛於亞駝神一本  
詳其篆文乃先生詩中語也今載於此字有不可識者  
則書闕以補之其文曰秦嗣王敢用吉玉宣璧使其祝  
宗邵蕤布懸告於丕顯大神亞駝以底楚王熊相之多  
罪者我先君穆王及楚成王是戮力同心兩邦若壹絆  
以婚姻衿以齊盟曰萬葉子孫毋相為不利親印丕顯  
大神亞駝而質焉今楚王熊相庸回無道淫伐湛亂宣  
侈競縱變渝盟制內之則醜虐不宰刑殺孕婦幽刺親

戚拘圉其叔父置諸寘室櫝棺之中外之則冒改久關  
不畏皇天上帝及丕顯大神亞駝光烈威神而兼倍十  
八世之盟詛率諸侯之兵以臨加我欲剋伐我社稷  
滅我百姓口蔑我皇天上帝及丕顯大神亞駝之郊祠  
圭玉犧牲口取我邊城新鄧及於口鄧及於口不敢曰  
可今又悉興其衆張矜怠怒口甲口兵奮士盛師以偏  
我邊境將欲覆其口亦應受皇天上帝及丕顯大神亞  
駝之幾靈德賜克剋楚師復畧我邊城敵數楚王熊相  
之倍盟口詛著諸名章以盟大神之威神其文如此秦  
始皇本紀注祈年宮在雍史記商鞅傳孝公使衛鞅將  
而伐魏魏使公子卬將而擊之鞅詐公子卬會盟已飲  
伏甲士襲鹵公子卬因攻其軍盡破之以歸秦穀梁軍  
士粲然  
皆笑

王維吳道子畫

吳道子見前開元寺注李南  
名畫記王維字摩詰以詞學

知名官至尚

書右丞工畫

何處訪吳畫晉門與開元開元有東塔摩詰留手痕吾  
觀畫品中莫如二子尊道子實雄放浩如海波翻當其  
下手風雨快筆所未到氣已吞亭亭雙林間彩暈扶桑  
暎中有至人談寂滅悟者悲涕迷者手自捫蠻君鬼伯  
千萬萬相排競進頭如龜摩詰本詩老佩芷襲芳蓀今  
觀此壁畫亦若其詩清且敦祇園弟子畫鶴骨心如死  
灰不復溫門前兩叢竹雪節貫霜根交柯亂葉動無數

一一皆可尋其源吳生雖妙絕猶以畫工論摩詰得之於象外有如仙翮謝籠樊吾觀二子皆神俊又於維也歛衽無間言

唐米景元畫斷道子為神品上上摩詰為妙品上上名畫斷大凡佛之圓光皆須尺寸先定然後規圓而成惟吳生只一筆又云畫成矣最後方畫圓光風落電轉規成月圓王注開元寺有道子畫佛在雙林下入涅槃像又摩詰畫兩叢竹於開元寺莊子形若槁木心若死灰杜詩畫手看前輩吳生遠擅場又妙絕動官牆神仙傳王次仲變篆為隸始皇召之不至將殺之次仲化為大鳥振翼而起以三大翮墮與使者始皇因名為落翮仙唐張顛傳後輩言筆札者歐虞褚薛或有異論至張顛曾無間言

維摩像唐楊惠之塑在天柱寺

五代名畫補遺楊惠之與

吳道子同師張僧繇筆蹟號為畫友工藝並著而道子聲光獨顯遂焚棄筆硯發憤專思塑作能奪僧繇畫相與道子爭衡

昔者子輿病且死其友子祀往問之跼蹐鑒井自歎息造物將安以我為今觀古塑維摩像病骨磊嵬如枯龜乃知至人外生死此身變化浮雲隨世人豈不碩且好身雖未病心已疲此叟神完中有恃談笑可卻千熊羆當其在時或問法俛首無言心自知至今遺像兀不語



與昔未死無增虧田翁俚婦那肯顧時有野鼠銜其髭

見之使人每自失誰能與結

一作

無言師

莊子子輿有病子祀往問之曰偉哉夫造物者將以予為此拘拘也又跼蹐而鑑於井注跼蹐病而不能行兒維摩經是身如浮雲須臾變滅又文殊師利問維摩詰何等是菩薩不二法門時維摩詰默然無言晉書謝靈運髭美臨刑因施作南海祇洹寺維摩詰像髭寺人保惜畧不污損

### 東湖

吾家蜀江上江水綠如藍過來走塵土意思殊不堪况當岐山下風物尤可慙有山禿如赭有水濁如泔不謂

郡城東數武見湖潭入門便清興  
恍如夢西南泉源從高來隨波走  
涵涵東去觸重阜盡為湖所貪  
但見蒼石螭開口吐清甘借汝腹  
中過胡為目耽耽新荷弄晚涼  
輕棹極幽探飄飄忘遠近偃息遺  
佩簪一作魚深有龜一作

與魚

一作龜

淺有螺與蚌曝晴復戲雨戢戢多  
於蠃浮沉

無停餌倏忽遽滿籃絲緝雖強致  
瑣細安足戢聞昔周

道興翠鳳棲孤嵐飛鳴飲此水照  
影弄毳毳

公自注此古飲鳳池

也至今多梧桐合抱如彭聃綵羽  
無復見上有鸛搏鷁

烏舍切

嗟予生雖晚好古意所耽

同

圖書已漫漶猶復訪

僑郢卷阿詩可繼此意久已舍扶風古三輔政事豈汝  
諳聊為湖上飲一縱醉後談門前遠行客劫劫無留驂  
問胡不回首無乃趁朝參予今正疎懶官長幸見函不  
辭日游再行恐歲滿三暮歸仍倒載鐘鼓已餽餽

詩小雅終朝采藍鄭箋藍染草也李白詩山光水色青  
於藍白樂天詩春來江水綠如藍韓南山詩或赤若禿  
鬚秦始皇本紀始皇至湘山祠逢大風幾不得度上問  
博士曰湘君何神對曰堯女舜妻死而葬於此始皇大  
怒使刑徒三千人伐湘山木赭其山橐宇記周文王之  
時丹鳳鳴於岐山故亦曰鳳皇堆王注僑鄭子產也晉

侯稱其博物君子鄧子言少昊氏以鳥名官仲尼曰天子失官學在四尺猶信三輔黃圖京兆在故城內尚冠里馮翊在故城內太上皇廟西南扶風在夕陽街北三輔者謂主爵中尉及左右內史漢武帝改曰京兆尹左馮翊右扶風共治長安城中是為三輔後漢光武之後扶風出治楓里馮翊出治高陵晉書山簡傳日暮倒載歸酩酊無所知宋韻注儲儲鐘鼓微也

### 真興寺閣

山川與城郭漠漠同一形市人與鴉鵲浩浩同一聲此閣幾何高何人之所營側身送落日引手攀飛星當年王中令斫木南山楨寫真留閣下鐵面眼有稜身強一作

長八九尺與閣兩崢嶸古人雖暴恣作事今世驚登者尚呀喘作者何以勝曷不觀此閣其人勇且英

王注王彥超周末宋初為鳳翔節度使晉書桓溫傳劉惔嘗稱之曰溫眼如紫石稜

李氏園

公自注李茂貞園也今為王氏所有五代史茂貞本姓宋名文通唐僖宗

間以功拜鳳翔隴右節度使賜姓名昭宗景福元年反犯京師加拜尚書令封岐王後唐莊宗同光二年卒

朝游北城東回首見修竹下有朱門家破墻圍古屋舉鞭叩其戶幽響答空谷入門所見夥十步九移目異花

兼四方野鳥喧百族其西引溪水活活轉墻曲東注入  
深林林深牕戶綠水光兼竹淨時有獨立鵲林中百尺  
松歲久蒼鱗蹙豈惟此地少意恐關中獨小橋過南圃

一作  
蒲

夾道多喬木隱如城百雉挺若舟千斛陰陰日光

淡黯黯秋氣蓄盡東為方池野鴈雜家鶩紅梨驚合抱  
映島孤雲馥春光水溶漾雪陣風翻撲其北臨長溪波  
聲卷平陸北山卧可見蒼翠間磽秃我時來周覽問此  
誰所築云昔李將軍負險乘哀叔抽錢算閒口但未摧

羹粥當時奪民田失業安敢哭誰家美園囿藉沒不容

贖此亭破千家鬱鬱城之麓將軍竟何事蟻蝨生刀韞

何嘗載美酒來此駐車轂空使後世人聞名頸猶縮

公自

注俗猶呼皇后園蓋茂貞謂其妻也我今官正閒屢至因休沐人生營居

止竟為何人卜何當辦一身永與清景逐

左傳都城過百雉國之害也注方丈曰堵三堵曰雉漢書注漢律人出一算算百二十錢唯賈人與奴婢倍算貢禹傳禹言口錢起武帝民產子三歲則出口錢故民重困至於生子輒殺宜令兒七歲去齒乃出口錢年二十乃算唐史肅宗時軍用不給乃稅閒架廣韻韜弓衣史記石建為郎中令每五日洗沐歸謁親漢書張安世

傳休沐  
未嘗出

秦穆公墓

三輔黃圖橐泉宮皇覽曰秦穆公冢在橐泉宮祈年觀下

橐泉在城東墓在城中無百步乃知昔未有此城秦人

以泉識公墓

識音志

昔公生不誅孟明豈有死之日而忍

用其良乃知三子殉公意亦如齊之二子從田橫古人

感一飯尚能殺其身今人不復見此等乃以所見疑古

人古人不可望今人益可傷

左傳文六年秦伯任好卒以子車氏之三子奄息仲行鍼虎為殉皆秦之良也國人哀之為之賦黃鳥史記田



僖傳田橫與其客二人乘傳詣洛陽至尸鄉廐置自剄  
高帝為之流涕而拜其二客為都尉以王者禮葬田橫  
既葬二客穿其冢旁孔皆自剄下從之後漢李固傳  
感古人一飯之報注靈輒也靈輒事見左傳宣二年

和子由聞子瞻將如終南太平宮谿堂讀書

役名則已勤徇身則已媮我誠愚且拙身名兩無謀始  
者學書判近亦知問囚但知今當為敢問向所由士方  
其未得惟以不得憂既得又憂失此心浩難收譬如倦  
行客中路逢清流塵埃雖未脫暫憩得一漱我欲走南  
澗春禽始嚶啾鞅掌久不決爾來已徂秋橋山日月迫

府縣煩差抽王事誰敢憖民勞吏宜羞中間罹旱暵欲  
學喚雨鳩千夫挽一木十步八九休渭水涸無泥菑堰  
旋插修對之食不飽餘事更遑求近日秋雨足公餘試  
新篳劬勞幸已過朽鈍不任鍤秋風欲吹帽西阜可縱  
遊聊為一日樂慰此百日愁

唐有書判拔萃科史記黃帝葬橋山前漢溝洫志武帝  
歌曰隤林竹兮捷石菑廣韻篳酒篳晉書九月九日桓  
溫讌於龍山風  
吹孟嘉帽落

將往終南和子由見寄

人生百年寄鬢鬚富貴何啻葭中草惟將翰墨留染濡  
絕勝醉倒蛾眉扶我今廢學如寒竽久不吹之澀欲無  
歲云暮矣嗟幾餘欲往南溪侶

一作旅

禽魚秋風吹雨涼

生膚夜長耿耿添漏壺窮年弄筆衫袖烏古人有之我  
願如終朝危坐學僧趺閉門不出閑履舄下視官爵如  
泥淤嗟我何為久踟躕歲月豈肯與汝居僕夫起餐秣  
吾駒

前漢書非有葭莩之親注葭裏之白皮者喻輕薄也韓  
子齊宣王好竽必三百人齊吹南郭先生不善竽而濫

於三百之中以食祿湣王立欲一一吹之先生乃逃趙  
壹非草書歌十日一筆月數丸墨領袖如阜脣齒皆黑  
後漢王喬有神術顯宗時為葉令每朔望來朝明帝怪  
之令太史伺望輒有雙鳧從東來羅之得雙鳧詔尚書  
診視乃四年中所賜履舄也韓退之送李愿歸盤谷  
序膏吾車芳秣吾馬又天星詩僕夫起餐車載脂

七月二十四日以久不雨出禱礮溪是日宿號  
縣二十五日晚自號縣渡渭宿於僧舍曾閣閣  
故曾氏所建也夜久不寐見壁有前縣令趙薦  
留名有懷其人

龕燈明滅欲三更歌枕無人夢自驚深谷留風終夜響

亂山銜月半牀明故人漸遠無消息古寺空來看姓名  
欲向磻溪問姜叟僕夫屢報斗杓傾

二十六日五更起行至磻溪未明

夜入磻溪如入峽照山炬火落驚猿山頭孤月耿猶在  
石上寒波曉更喧至人舊隱白雲合神物已化遺蹤蜿  
安得夢隨霹靂駕馬上傾倒天瓢翻

王注至人舊隱太公也神物龍也磻溪有龍於此地禱  
雨也酉陽雜俎李鄴在北都介休百姓送解牒宿晉祠  
宇下夜有人叩門云介休王暫借霹靂車至介休收麥  
良久數人共持一物如幢上綴旗幡凡十八葉有光如

電以授之次日介休大雷雨損麥千餘頃又李靖嘗投宿一巨宅有老婦延之中夜叩戶甚迅婦出謂靖曰老婦龍也二子俱出今天命行雨欲煩一行遂韞青驄馬以一瓢水與之戒曰馬躩地嘶鳴即取水一滴滴馬鬣上一滴乃地上一尺慎勿多也靖見旱極連下三十餘滴靖歸婦驚語曰平地水深三丈矣詩意主禱雨故用事此

是日自礮溪往陽平憩於麻田青峯寺之下院  
翠麓亭

不到峯前寺空來渭上村此亭聊可喜修徑豈辭捫谷  
映朱欄秀山含古木尊路窮驚石斷林缺見河奔馬困

嘶青草僧留薦晚飧  
我来秋日午旱久石牀温  
安得雲如盖能令雨瀉  
盆共看山下稻涼葉晚  
翻翻

三水小牘安定郡有峴陽峰峰上有池若雨則雲起池中如車盖然故里諺曰峴山張盖雨霧霈杜詩白帝城頭雲若屯白帝城下雨翻盆

二十七日自陽平至斜谷宿於南山中蟠龍寺  
橫槎晚渡碧澗口騎馬夜入南山谷谷中暗水響瀧瀧  
嶺上踈星明煜煜寺藏崑底千萬仞路轉山腰三百曲  
風生饑虎嘯空林月黑驚麕竄修竹入門突兀見深殿

照佛青燐有殘燭  
媿無酒食待游人  
旋斫杉松煮溪藪  
板閣獨眠驚旅枕  
木魚曉動隨僧粥  
起觀萬瓦鬱參差  
日亂千巖散紅綠  
門前商賈負椒苴  
山後咫尺連巴蜀  
何時歸耕江上田  
一夜心逐南飛鵠

杜甫宿贊上人房詩  
夜深殿突兀風動金琅璫

是日至下馬磧憩於北山僧舍有閣曰懷賢南  
宜斜谷西臨五丈原諸葛孔明所從出師也

南望斜谷口三山如犬牙西觀五丈原鬱屈如長蛇有



懷諸葛公萬騎出漢巴吏士寂如水蕭蕭聞馬槓公才  
與曹丕豈止十倍加顧瞻三輔間勢若風卷沙一朝長  
星墜竟使蜀婦髻山僧豈知此一室老烟霞往事逐雲  
散故山依渭斜客來空弔古清淚落悲笳

漢書文帝紀高帝王子弟地犬牙相制注犬牙言地形  
如犬之牙交相入也長安志引水經注斜水北歷斜谷  
過五大原亦謂之武功水又曰武功蓋在渭水南郿縣  
北是蜀志建興十二年諸葛亮悉大衆由斜谷出以流  
馬運據武功五大原與司馬仲達對於渭南分兵屯田  
為久住之基耕者雜於渭濱之間而百姓安堵軍無私  
焉詩車攻篇蕭蕭馬鳴毛傳言不謹譁也公詩用此意  
韻注馬槓鞭也諸葛亮傳先生病篤召亮謂曰君才十

倍曹丕必能安國家定大事晉陽秋有星赤而芒角自  
東北西南流投於亮營三投再還往大還小俄而亮卒  
戴記婦人髻而弔也自敗於孤貽始也  
蓋魯臧紇敗於孤貽國人送喪者皆髻

施註蘇詩卷一